

濟南府志

卷三十四

宦蹟一

宦蹟二


第六十冊



濟南府志卷三十三

宦蹟一

漢



按漢書循吏傳云漢興之初與民休息禁罔疏闊而相國蕭曹以寬厚清靜爲天下帥民作畫一之歌孝惠垂拱天下晏然至于文景遂移風易俗是時循吏皆謹身帥先居以廉平孝武之世儒者以經術飾吏事及至孝宣厲精爲治刺史守相輒親見問觀其所繇退而考察所行以質其言常稱曰庶民所以安其田里而無歎息愁恨之心者政平訟理也與我共此者其惟良二千石乎以爲太守吏民之本也數變易則下不安民知其將久不可欺罔迺服從其教化故二千石有治理效輒以璽書勉

濟南府志

卷三十三

宦蹟一

一

屬增秩賜金是故漢世良吏於是爲盛所居民富所去見思然傳中所載文翁以下六人均與今濟南無涉知齊相濟南相濟南太守平原太守之屬散見各列傳或無事蹟可傳秩官已列其名無庸復載茲取通志舊志各邑志採其政績有關郡屬者共十四人稽之正史以類相從彙爲一篇用冠宦蹟之首焉

漢

曹參沛人秦時爲獄掾高祖以長子肥爲齊王而以參爲相國賜爵列侯食邑平陽孝惠元年更爲齊丞相其治要用黃老術相齊九年齊國安集大稱賢相蕭何薨參聞之告舍人趣治行吾且入相居無何使者果召參屬其後相曰以齊獄吏爲寄慎勿擾也後相曰治無大於此者乎參曰不然夫獄吏者所以并容

也今君擾之姦人安所容乎吾是以先之代何爲相國舉事無所變更諡曰懿侯

爰盎字絲楚人徙安陵文帝時爲郎中數直諫調隴西都尉仁愛士卒士卒皆爭爲死遷齊相徙爲吳相吳王厚遇盎告歸

按史記作袁漢書作爰攷證云爰與袁轅通本一族也

石慶趙人徙溫萬石君奮之次子以馴行孝謹官至二千石武帝

時出爲齊相齊國慕其家行不治而齊國大治爲立石相祠自

沛守爲太子太傅遷御史大夫爲丞相封牧邱侯諡曰恬

王父偃齊國臨菑人學長短縱橫術晚乃學易春秋百家之言武

帝初上書闕下朝奏暮召入見迺拜爲郎中元朔中偃言齊王

內有淫失之行上拜偃爲齊相至齊徧召昆弟賓客散五百金

濟南府志

卷三十二

宦蹟一

二

子之曰始吾貧時昆弟不我衣食賓客不我納門今吾相齊諸君迎我或千里吾與諸君絕矣毋復入偃之門及齊王自殺遂誅偃偃方貴幸時客以千數及族死無一人視獨孔車收葬焉上聞之以車爲長者

卜式河南人以田畜爲事武帝時方事匈奴上書願輸家財半助邊上不報是時富豪皆爭匿財唯式尤欲助費上以式終長者召拜爲中郎賜爵左庶長田十頃布告天下上以式朴忠拜爲齊王太傅轉爲相會呂嘉反上書請行上賢之詔曰齊相雅行躬耕隨收畜蕃輒分昆弟更造不爲利惑往年西河歲惡率齊人入粟今又首奮雖未戰可謂義形於內矣賜爵關內侯

顏安樂字公孫魯國薛人與嚴彭祖俱事睦孟家貧爲學精力傳

公羊春秋穎門教授官至齊郡太守丞

韓千秋京兆人武帝時為濟南相奮擊南越力戰而死因封其子
延年為成安侯

鄭當時字莊陳人以任俠自喜聲聞梁楚間孝景時為太子舍人
每五日洗沐請謝賓客常恐不徧其知友皆天下有名士武帝
卽位遷為魯中尉濟南太守江都相至九卿每朝候上聞說未
嘗不言天下長者其推轂士及官屬丞史誠有味其言也聞人
之善言進之上唯恐後山東諸公以此翕然稱之昆弟至二千
石者六七人

顏異武帝時為濟南亭長以廉直遷至九卿

冷豐字次君淮陽人師事顏安樂傳公羊春秋為淄川太守聲稱

濟南府志

卷三十三

宦蹟一
漢

三

當時

蕭望之字長倩東海蘭陵人徙杜陵好學治齊詩以射策甲科為

郎宣帝時為謁者累遷諫大夫丞相司直歲中三遷官至二千

石是時選博士諫大夫通政事者補郡國守相以望之為平原

太守望之雅意在本朝遠為郡守內不自得乃上疏曰陛下哀

愍百姓恐德化之不究悉出諫官以補郡吏所謂憂其末而忘

其本者也朝無爭臣則不知過國無達士則不聞善願陛下選

明經術温故知新通於幾微謀慮之士以為內臣與參政事諸

侯聞之則知國家納諫憂政亡有闕失若此不怠成康之道其

庶幾乎外郡不治豈足憂哉書聞徵入守少府宣帝察望之經

明持重論議有餘材任宰相欲詳試其政事以為左馮翊望之

從少府出爲左遷恐有不合意卽移病上聞之使侍中成都侯
金安上諭意曰所用皆更治民以考功君前爲平原太守日淺
故復試之於三輔非有所聞也望之卽視事三年京師稱之遷
大鴻臚代丙吉爲御史大夫

匡衡字稚圭東海承人好學家貧庸作以供資用尤精力過絕人
射策甲科除爲太常掌故調補平原文學學者多上書薦衡經
明當世少雙令爲文學就官京師後進皆欲從衡平原衡不宜
在遠方事下太子太傅蕭望之少府梁邱賀問衡對詩諸大義
其對深美望之奏衡經學精習說有師道可觀覽宣帝不甚用
儒遣衡歸官而皇太子見衡對私善之元帝卽位樂陵侯史高
以外屬爲大司馬車騎將軍領尚書事長安令楊興說高曰將

濟南府志

卷三十三

宦蹟一
漢

四

軍以親戚輔政貴重於天下無二然眾庶論議令問休譽不專
在將軍者何也彼誠有所聞也以將軍之莫府海內莫不仰望
而所舉不過私門賓客乳母子弟人情忽不自知然一夫竊議
語流天下夫富貴在身而列士不譽是有狐白之裘而反衣之
也古人病其若此故卑體勞心以求賢爲務傳曰以賢難得之
故因曰事不待賢以食難得之故而曰飽不待食惑之甚者也
平原文學匡衡材智有餘經學絕倫但以無階朝廷故隨牒在
遠方將軍誠召置莫府學士欽然歸仁與叅軍議觀其所有貢
之朝廷必爲國器以此顯示眾庶名流於世高然其言辟衡爲
議曹史薦衡於上上以爲郎中遷博士給事中遷光祿大夫太
子少傅御史大夫代韋元成爲丞相封樂安侯

到都河東大陽人景帝時爲中郎將敢直諫面折大臣於朝濟南
閻氏宗人三百餘家豪猾二千石莫能制於是拜都爲濟南守
至則誅閻氏首惡餘皆股栗居歲餘郡中不拾遺旁十餘郡守
畏都如大府都爲人勇有氣公廉不發私書問遺無所受請寄
無所聽常稱曰己背親而出身固當奉職死節官下終不顧妻
子矣遷中尉免歸拜鴈門太守其官其味
甯成南陽穰人以郎謁者事景帝好氣爲少吏必陵其長吏爲人
上操下急如束溼稍遷至濟南都尉而到都爲守始前數都尉
步入府因吏謁守如縣令其畏都如此及成往直凌都出其上
都素聞其聲善遇與結驩久之都死後長安左右宗室多犯法
上召成爲中尉

濟南府志

卷三十三

宦蹟一
漢

五

按以上二人舊志以史記漢書俱入酷吏傳中削而不載茲
以事涉濟南姑附宦蹟之後

後漢

按後漢書循吏傳云初光武長於民間頗達情僞天下已定務
用安靜勤約之風行於上下廣求民瘼觀納風謠故能內外匪
懈百姓寬息自臨宰邦邑者競能其官章和以後其有善績者
往往不絕然傳中所載循吏十二人在今府屬者惟劉寵一人
餘竝散見於列傳之中舊志所錄多泰山渤海事蹟竝非今界
茲據通志及各邑志所載質之正史其政蹟可傳者十三人列
爲宦蹟若事無可考仍歸之秩官焉

後漢

吳漢字子顏南陽宛人光武初爲大將軍遷大司馬封舞陽侯建武三年北擊清河長垣及平原五里賊皆平之時鬲縣五姓共逐守長據城而反諸將爭欲攻之漢不聽曰使鬲反者皆守長罪也敢輕冒進兵者斬乃移檄告郡使收守長而使人謝城中五姓大喜卽相率歸降諸將乃服曰不戰而下城非眾所及也又擊富平獲索二賊於平原東方悉定振旅還京

章懷注云鬲縣名屬平原郡在今德州西北五姓蓋當土疆
宗豪右也

伏湛字惠公琅邪東武人九世祖勝字子賤所謂濟南伏生者也高祖孺客授東武因家焉湛性孝友成帝時以任爲博士弟子更始立以爲平原太守時倉卒兵起天下驚擾而湛獨晏然教

濟南府志

卷三十三

宦蹟一
後漢

六

授不廢謂妻子曰夫一穀不登國君徹膳今民皆飢奈何獨飽乃共食麤糲悉分奉祿以賑鄉里來客者百餘家時門下督素有氣力謀欲爲湛起兵湛惡其惑眾卽收斬之徇首城郭以示百姓於是吏人信向郡內以安平原一境湛所全也光武卽位知湛名儒舊臣徵拜尚書使典定舊制拜爲司直行大司徒事建武三年代鄧禹爲大司徒封陽都侯

趙憙字伯陽南陽宛人少有節操光武初爲懷令遷平原太守時平原多盜賊憙與諸郡討捕斬其渠帥餘黨當坐者數千人憙上言惡惡止其身可一切徙京師近郡帝從之乃悉移至潁川陳留於是擢舉義行誅鋤姦惡後青州大蝗侵入平原界輒死歲屢有年百姓歌之二十六年徵爲太僕拜太尉賜爵關內侯

史弼字公謙陳留考城人少篤學聚徒數百仕州郡辟公府遷北
軍中候桓帝弟渤海王悝多不法弼上封事帝以至親不忍下
其事後貶爲瘿陶王弼遷尚書出爲平原相時詔書下舉鈞黨
郡國所奏相連及者多至數百唯弼獨無所上詔書前後切却
州郡髡管掾史從事坐傳責曰詔書疾惡黨人旨意懇惻青州
六郡其五有黨近國甘陵亦考南北部平原何理而得獨無弼
曰先王疆理天下畫界分境水土異齊風俗不同它郡自有平
原自無朔可相比若承望上司誣陷良善淫刑濫罰以逞非理
則平原之人戶可爲黨相有死而已所不能也從事大怒卽收
郡僚職送獄遂舉奏弼會黨禁中解弼以俸贖罪得免濟活者
千餘人弼爲政特挫抑疆豪其小民有罪多所容貸遷河東太

濟南府志

卷三十三

宦蹟一
後漢

七

守

劉寵字祖榮東萊牟平人齊悼惠王之後以明經舉孝廉爲東平
陵令以仁惠爲吏民所愛母疾棄官去百姓將送塞道車不得
進乃輕服遁歸後四遷爲豫章太守又三遷拜會稽太守徵爲
將作大匠轉宗正大鴻臚延熹四年代黃瓊爲司空頻遷司徒
太尉免歸家無貨積以老病卒于家

何敞字文高扶風平陵人元和中辟太尉宋由府常引大體多所
匡正司徒袁安亦深敬重之以高第爲侍御史時濟南王康尊
貴驕甚車騎將軍竇憲乃白出敞爲濟南太傅敞至國輔康以
道義數引法度諫正之康敬禮焉歲餘遷汝南太守

溫壽太原祁人鄒平侯相初壽父序爲苟宇所劫伏劍死光武賜

葬雒陽城旁除三子爲郎中服竟壽以長子爲鄒平侯相夢序告之曰久客思鄉里壽卽棄官上書乞骸骨歸葬

劉雄不知何許人爲平原令甚著威惠安帝永初二年劇賊畢豪等犯縣界雄自將吏士乘船追之及於厭次河與賊合戰眾寡不敵賊執雄以矛刺之小吏所輔代死雄乃免

楊匡陳留人好學嘗在外黃大澤教授門徒補蘄長政有異績遷平原令時國相徐曾中常侍璜之兄也匡恥與接事託疾牧豕去初辟爲太尉杜喬掾後喬爲梁冀中傷與李固俱死暴尸城北匡聞之號泣星行到洛陽乃著故赤幘託爲夏門亭吏守衛尸喪積十二日都官從事執之太后義而不罪於是帶鉢質詣闕上書乞李杜骸骨太后許之匡成禮殯殮送喬喪還家葬送

濟南府志

卷三十三

宦蹟一
後漢

八

行服隱匿不仕

袁山松書匡一名章字叔康也

高柔字文惠陳留圉人父靖爲蜀郡都尉柔留鄉里柔從兄幹袁紹甥也在河北呼柔柔舉宗從之會靖卒於西州時道路艱澀兵寇縱橫而柔冒艱險詣蜀迎喪辛苦荼毒無所不嘗三年乃還獻帝建安十年曹操平袁氏以柔爲管長縣中素聞其名奸吏數人皆自引去柔教曰昔邴吉臨政吏嘗有非猶尚容之況此諸吏於吾未有失乎其召復之吏還皆自勵咸爲佳吏柔處法允當事無留滯辟爲丞相理曹屬遷潁川太守

按續漢書郡國志濟南國領十城其五曰管縣有賴亭今章

邱縣境

司馬芝字子華河內溫人少爲書生避亂荊州於魯陽山遇賊芝坐守老母賊至以刀臨芝芝叩頭曰母老惟在諸君賊曰此孝子也殺之不義芝以鹿車推載母居南方十餘年躬耕守節曹操平荊州以芝爲管長郡主簿劉節舊族豪俠賓客千餘家出爲盜賊入亂吏治頃之芝差節客王同等爲兵而節藏同等因令督郵以軍興詭責縣掾史窮困乞代同行芝乃馳檄濟南具陳節罪太守素信芝卽以節代同行青州號芝以郡主簿爲兵遷廣平令歷甘陵沛陽平太守所在有績

周綉字文通下邳徐人好韓非之術少爲廷尉史永平中補南行唐長遷博平令以威名遷齊相亦頗嚴酷專任刑法而善爲辭案條教爲州內所則建初中爲渤海太守

濟南府志

卷三十三

宦蹟一
後漢

九

陽球字方正漁陽泉州人好申韓之學初舉孝廉補尚書侍郎出爲高唐令遷平原相出教曰相前莅高唐志掃姦鄙遂爲貴郡所見枉舉昔桓公釋管仲射鉤之讎高祖赦季布逃亡之罪雖以不德敢忘前義况君臣分定而可懷宿昔哉今一獨往愆期諸求效若受教之後而不改姦狀者不得復有所容矣郡中咸畏服焉

按以上二人俱載後漢書酷吏傳中茲以附宦蹟之後

魏

按魏志云漢末雄豪竝起太祖運籌演謀鞭撻宇內寧申商之法術該韓白之奇策官方授材各因其器文帝博聞彊識才藝兼該明帝沈毅斷識任心而行於時百姓彫敝竝無遠猷此魏

之治績所以遠邇於兩漢也陳壽三國志不立循吏傳舊志所載多以漢官入之失於限斷茲據通志及各邑志採其事蹟共得四人亦一時才能之選名臣之亞矣

魏

孫禮字德達涿郡容城人太祖平幽州召爲司空軍謀掾除河間郡丞遷滎陽都尉徙魯相歷山陽平原平昌琅邪太守遷陽平太守入爲尚書明帝遺詔拜禮大將軍長史加散騎常侍出爲揚州刺史徵拜少府出爲荊州刺史遷冀州牧太傅司馬懿謂禮曰今清河平原爭界八年更二刺史靡能決之虞芮待文王而了宜善令分明禮曰訟者據墟墓爲驗聽者以先老爲正而老者不可加以覆楚又墟墓或遷就高敞或徙避仇讎如今所

濟南府志

卷三十三

臣蹟一
魏

十

聞雖臯陶猶將爲難若欲使必也無訟當以烈祖初封平原時圖決之何必推古問故以益辭訟昔成王以桐葉戲叔虞周公便以封之今圖藏在天府便可於坐上斷也豈待到州乎宣王曰是也當別下圖禮到案圖宜屬平原而曹爽信清河言下書云圖不可用當參異同禮上疏曰管仲霸者之佐其器又小猶將奪伯氏駢邑使沒齒無怨言臣受牧伯之任奉聖朝明圖驗地著之界界實以王翁河爲限而郇以馬丹候爲驗詐以鳴犢河爲界假虛訟訴疑誤臺閣竊聞眾口鑠金浮石沈木三人成市虎慈母投其杼今二郡爭界八年一朝決之者緣有解書圖畫可得尋案摭校也平原在兩河向東上其間有爵隄爵隄在高唐西南所爭地在高唐西北相去二十餘里所謂長歎息流

涕者也案解與圖奏而郇不受詔此臣軟弱不勝其任臣亦何顏尸祿素餐輒東帶著履駕車待放爽見禮素大怒劾禮怨望結刑五歲在家期年眾人多以爲言除城門校尉尋爲并州刺史凡臨七郡五州皆有威信遷司空封大利亭侯嘉平二年薨諡曰景

徐宣字寶堅廣陵海西人太祖辟爲司空掾屬除東緡發于令遷齊郡太守性清雅特立不拘世俗確然難動有社稷之節歷任州郡所在稱職文帝踐阼爲御史中丞賜爵關內侯明帝卽位封津陽亭侯擢左僕射加侍中光祿大夫青龍四年卒諡曰貞侯

高堂隆字升平泰山平陽人魯高堂生後也少爲督郵去吏避地

濟南府志

卷三十三

宦蹟一

七

濟南建安十八年太祖召爲丞相軍議掾後爲歷城侯徵文學轉爲相以義正諫甚得輔導之節黃初中爲堂陽長以選爲平原王傅王卽尊位是爲明帝以隆爲給事中博士駙馬都尉帝初踐阼羣臣或以爲宜饗會隆以爲不宜爲會帝敬納之遷陳留太守徵爲散騎常侍賜爵關內侯

邢禹字子昂河間鄆人舉孝廉司徒辟皆不就適右北平從田疇遊太祖定冀州遂裴還鄉里乃見太祖求爲鄉導辟爲冀州從事時人稱之曰德行堂堂邢子昂除廣宗長更辟司空掾除行唐令入爲丞相門下督遷左馮翊病去官是時太祖諸子高選官屬令曰侯家吏宜得淵深法度如邢禹輩遂以爲平原侯植家丞禹防閑以禮無所屈初太子未定太祖問禹對曰以庶代

宗先世之戒也遂以爲太子少傅遷太傅文帝踐阼爲侍中尚書僕射賜爵關內侯出爲司隸校尉徙太常黃初四年卒

晉

按晉書良吏傳云武帝受禪垂意黎元申勅守宰之司屢發憂矜之詔辭音懇切誨諭殷勤欲使直道正身抑末敦本當此時也可謂農安其業吏盡其能者歟爰及惠懷逮於江左良能之績僅有存焉舊志所載惟平原太守二人失之簡略茲據通志及各邑志所載共得六七人而南燕一人亦附見於後猗歟良宰嗣美前賢此數人者亦足以當之矣

晉

阮种字德猷陳留尉氏人弱冠有殊操爲嵇康所重武帝時察孝

濟南府志

卷三十三

宦蹟一

五

廉爲公府掾太保何曾舉种賢良與郤詵俱居上第除尚書郎又擢爲第一轉中書郎進止有方正已率下朝廷咸憚其威容每爲駁議事皆施用遂爲楷則遷平原相時襄邑衛京自南陽太守遷於河內與种俱拜帝望而歎曰二千石皆若此朕何憂乎种爲政簡惠百姓稱之卒於郡

辟閭渾孝武時爲北平原太守齊國內史蔣喆殺樂安太守辟閭濬據青州反渾討平之

劉遐字正長廣平易陽人性果毅有勇略當懷愍旣陷遐壁屯於河濟之間賊不敢近間道遣使受元帝節度帝嘉之璽書慰勉以爲龍驤將軍平原內史徙臨淮太守兗州刺史封泉陵公咸

和元年卒

邵續魏郡安陽人素有志烈初從成都王穎爲樂陵太守綏懷流散多歸附之尋以兵屬元帝以攻石勒功拜平原樂安太守封祝阿子後爲石季龍所敗屯濟南黃中固爲季龍所執送於石勒勒使人勸之降續灌園鬻菜以供衣食終不從遂遇害

陸機字士衡吳郡人少有異才文章冠世永嘉初中國多難機負其才望以成都王穎勞謙下士遂委身焉穎以機參大將軍軍事表爲平原內史太安初穎與河間王起兵討長沙王假機後將軍河北大都督固辭不許遂遇害於軍中

潘滿滎陽中牟人武帝時爲平原內史以學行稱

杜雄平原人慕容德僭立其母兄先在長安德恐遣雄子宏如長安問存否宏對曰臣至長安若不奉太后動止卽西如張掖以

濟南府志

卷三十三

官蹟一

三

死爲劾臣父雄年踰六十未沾榮貴乞本縣之祿以申烏鳥之情德曰宏爲君迎親爲父求祿忠孝人也乃以雄爲平原令宏至張掖被殺德聞而悲之厚撫其妻子雄亦能其官未幾卒

南宋

此大

晉

官蹟一

三

三

三

按宋書良吏傳云高祖起自匹庶知民事艱難細華屏欲戎車歲駕那旬不擾太祖幼而寬仁入纂大業命將動師經略司竟費由府實役不及民自此區寓晏安方內無事三十年間氓庶蕃息守宰之職以六基爲斷民有所係吏無苟得蓋宋世之極盛也暨元嘉二十七年天下騷動兵連不息莅民之官遷變屢蒲密之化事未易階矣茲據舊志及通志所載參以南史聊

舉五人以備南宋一代之良吏云爾

南宋

申恬字公休魏郡魏人宋受命爲下邳北海二郡太守所至皆有政績元嘉十二年遷督魯東平濟北三郡諸軍事太山太守威惠兼著吏人便之二十一年冀州移鎮歷下以恬爲冀州刺史加督明年加濟南太守孝武踐阼爲青州刺史尋加督齊地連歲興兵百姓彫弊恬防邊禦境勸課農桑二三年閒遂皆優實性清約頗處州郡妻子不免飢寒世以此稱之

垣護之字彥宗略陽垣道人少儻不拘小節元嘉初爲殿中將軍隨到彥之北侵魏領濟北太守屯歷下孝武討逆護之率所領赴義帝以爲冀州刺史封益陽侯拜青冀二州刺史鎮歷城大明二年徵還轉臨淮太守徙豫州刺史八年卒謚壯侯

濟南府志

卷三十三

宦蹟一
南宋

十四

按南史本傳護之爲濟北太守宋書王元謨傳作濟南太守未知孰是

王誕字茂世琅邪臨沂人太保宏兄也少有才藻除員外散騎常侍高祖請爲太尉諮議參軍轉長史盡心歸奉日夜不懈高祖甚委仗之北伐廣固領齊郡太守盧循自蔡州南走劉毅固求追討高祖持疑未決誕曰公旣平廣固復滅盧循則功蓋終古勲無與二如此大威豈可餘人分之毅與公同起布衣一時相推耳今旣已喪敗不宜復使立功高祖從其說

周雲元嘉初爲平昌縣令篤馬河決率居民築堤禦之邑人明僧紹有記

馮顯河東人元嘉中爲鬲縣令廉潔有惠政

德平志云明嘉靖中基山鄉民掘地得斷碣載有周馮二令云
北魏

按魏書良吏傳云有魏初拓中州兼并疆域擁節分符多出豐沛政術治風未能咸允高祖肅明綱紀賞罰必行肇革舊軌時多奉法世宗優游而治寬政遂往太和之風頗以陵替肅宗馭運天下澆然其於移風革俗之美浮虎還珠之政九州百郡無所聞焉考良吏傳所列十二人惟鹿生爲濟南太守餘俱散見列傳之中舊志所採缺略不全茲據通志及各邑志證之魏書參以北史而元魏一代之治績粲然可觀矣

北魏

武昌王平原魏道武帝子河南王曜之孫忠果有智略顯祖時蠕

濟南府志

卷三十三

宦蹟一
北魏

五

蠕犯塞從駕擊之戰功居多拜假節都督齊兗二州諸軍事鎮南將軍齊州刺史善於懷撫邊民歸附者千有餘家高祖時妖賊司馬小君屯聚平陵身自討擊擒送京師斬之時歲穀不登齊民飢饉以私米三千餘斛爲粥以全民命北州戍卒一千餘人還者皆給路糧百姓咸稱詠之州民韓凝之等千餘人詣闕頌之高祖覽而嘉歎太和十一年薨諡曰簡王

拓跋鑿字紹遠平原之次子襲爵少有父風頗覽書傳沈重少言寬和好士出爲征虜將軍齊州刺史時革變之始百度惟新上書遵高祖之旨下采齊之舊風軌制粲然皆合規矩高祖謂侍臣曰諸州刺史皆能如此變風易俗更有何難下詔褒美兄和隨至歷城言無不從世宗初轉徐州刺史年四十二薨諡曰悼

王

拓跋子華字伏榮魏平文皇帝子高涼王孤之後華山王鷲之孫
龔爵孝莊初除齊州刺史先是州境數經反逆邢杲之亂人不
自保子華拘集豪右委之管籥眾皆感悅境內帖然在官不爲
矯激之行凡有餽贈辭多受少鞠獄訊囚務加仁恕齊人樹碑
頌德後除濟州刺史

拓跋修義字壽安魏景穆帝子汝陰王天賜之第五子涉獵書傳
頗有文才爲高祖所知自元士稍遷左將軍齊州刺史以齊州
頻喪刺史累表固辭詔曰修短有命吉凶由人何得過致憂憚
以乖維城之寄違凶就吉時亦有之可聽更立館宇於是移理
東城爲政寬和愛人在州四歲不殺一人百姓以是追思之遷

濟南府志

卷三十三

在蹟一
北魏

夫

秦州刺史累遷吏部尚書卒贈司空諡曰文

沛王欣字慶樂魏獻文帝子廣陵王羽之子肅宗初出爲征虜將
軍齊州刺史在州頗得人和封沛郡王邑一千戶改封淮陽王
韓麒麟昌黎棘城人漢大司馬增之後父瑚平原太守麒麟幼而
好學美姿容善騎射文成卽位賜爵漁陽男孝文時拜齊州刺
史假魏昌侯在官寡於刑罰從事劉普慶說之曰明公仗節方
夏無所斬戮何以示威答曰人不犯法何所戮乎若必須斬斷
以立威名當以卿應之普慶慙懼而退時新附之人未階臺宦
士人沈抑表請增置吏員廣延賢哲朝議從之太和十一年京
都大饑表陳時務十二年春卒於官麒麟立性恭慎恆置律令
於坐傍臨終之日唯有俸絹數十匹其清貧如此贈散騎常侍

燕郡公諡曰康

薛聰汾陰人魏宣武時爲齊州刺史政存簡靜卒於州吏民追思留其所坐榻以爲遺愛閣郡建祠祀焉

盧度世字子遷范陽涿人幼而聰達有計數以學行爲時流所重世祖時假節鎮遠將軍齊州刺史州接邊境將士數相侵掠乃禁勒所統還其俘虜二境以宣延興元年卒諡曰惠

鹿生濟陰乘氏人父壽興沮渠牧犍庫部郎生再爲濟南太守有治稱顯祖嘉其能特徵赴季秋馬射賜以驄馬加以青服彰其廉潔前後在任十年時三齊始附人懷苟且蒲博終朝頗廢農業生立制斷之聞者嗟善後歷徐州任城長史帶淮陽太守郟城鎮將正始中卒贈龍驤將軍兗州刺史

濟南府志

卷三十三

宦蹟一
北魏

七

李元護遼東襄平人頗覽文史習於簡牘宣武帝景明初爲輔國將軍齊州刺史其年入朝以州民柳世明圖爲不軌馳還歷城至卽擒殄值州內饑儉民人困敝志存隱恤表請賑貸蠲其賦役三年夏卒

袁翻字景翔陳郡項人少以才學擅美一時初奉朝請兼著作佐郎正始初考論律令除豫州中正議明堂制度孝明帝熙平初出爲平陽太守拜吏部郎中加平南將軍爲齊州刺史名位俱重當時賢達咸推與之

房士達清河繹幕人孝明帝武泰初拜平原太守抑挫豪強境內肅然時邢杲寇亂憚其威名越郡城西度不敢攻逼永安末轉

濟南太守永熙二年卒

江文遂濟陽考城人少有大度輕財好士士多歸之永平初出爲咸陽太守治爲諸郡最肅宗初拜平原太守善於緩納甚得物情在郡六年政理如在咸陽遷安州刺史

羊穆字叔宗隴西狄道人魏下邳太守紹先之子舉茂才世稱其廉信初爲義陽太守雅有恤民之稱孝明帝正光四年除平原相正直不私當官有善撫導民吏懷之孝昌二年徵爲征虜將軍太中大夫未發卒於郡諡曰貞

辛子馥字元穎穆之長子早有學行莊帝卽位除主客郎中尋除平原相父子竝爲此郡吏民懷安之元顥入洛不受其敕天平中爲東南道行臺左丞徐州長史入除太尉府司馬長白山連接三齊瑕邱數州之界多有盜賊受使檢覆因辨山谷要害宜

濟南府志

卷三十三

宦蹟一
北魏

末

立鎮戍之所諸州豪右在山鼓鑄奸黨依之密造兵仗請破罷諸治朝廷善而從之出爲清河太守武定八年卒於郡

按二辛傳竝見魏書辛紹先傳後新舊通志俱載入晉代大謬今改正之

鄭懿字景伯滎陽開封人安東將軍羲之長子涉歷經史善當世事閑雅有才爲高祖所器遇世宗初出爲征虜將軍齊州刺史好勸課善斷決義然後取百姓思之永平三年卒諡曰穆

劉休賓字處幹平原人徙都昌兄弟六人皆有時鑒南宋時爲幽州刺史鎮梁鄒魏慕容白曜軍至升城遣人說之降不從及歷城降乃出及宿有名望者十餘人俱入魏及魏立平齊郡以梁鄒民爲懷安縣休賓爲縣令延興二年卒

北齊

按北齊書循吏傳云高祖撥亂反正以卹隱爲懷故守令之徒才多稱職仍以戰功諸將出牧外藩不識治體無聞政術雖或直繩終無峻革此朝廷之大失太宐以後風雅俱缺焉第傳中所載如房仲幹之屬卓爾不羣然非本境無由甄錄茲據通志所載職官考之正史略舉二三人以備高齊一代之治績云

北齊

許惇字季良高陽新城人清識敏速達於從政任司徒主簿以能判斷見知時人號爲入鐵主簿遷陽平太守當時遷都鄴陽平卽是畿郡治爲天下第一遷魏尹出拜齊州刺史治竝有聲遷大理卿度支尚書賜爵萬年縣子

濟南府志

卷三十三

宦蹟一
北齊

九

房彥謙清河東武城人北齊時廣益王孝珩辟爲齊州主簿清簡守法境內肅然及周師入鄴齊主東歸以彥謙爲齊州治中從事彥謙將糾率忠義潛謀匡輔不果而止齊亡歸於家

顏之推字介珉琅琊臨沂人世善周官左氏早傳家業博覽羣書無不該洽顯祖見而悅之除奉朝請河清末除司徒錄事參軍尋除黃門侍郎周兵陷晉陽勸帝守三齊之地以爲平原太守令守河津齊亡入周爲御史隋開皇中以疾終有家訓二十篇行於世

北周

按北周書無循吏傳北史良吏傳載北魏至隋亦無北周一人豈搜羅之未徧或載籍之失傳乎茲考各志惟章邱志中載有

一人亟登之以比晨星之罕見焉

北周

耶茂字蔚之恒山新市人大象中爲衛國令時有繫囚二百茂親自究審數日釋免者百餘人歷年詞訟不詣州省有民張元預與從父弟思蘭不睦丞尉請加嚴法茂曰元預兄弟本相憎疾今坐得罪彌益其忿非化民之意也於是遣縣中耆老更往教諭道路不絕元預等各生感悔詣縣頓首謝罪茂曉之以義遂相親睦稱爲友悌

按北魏地形志東魏郡有衛國縣今章邱境

隋

按隋書循吏傳云高祖除凶靖亂日旰忘食思遺前王然專任

濟南府志

卷三十二

宦蹟一

北周

隋

法令嚴察臨下吏存苟免罕聞寬惠煬帝嗣興志存遠略奉公卽時升擢附下旋及誅夷求其廉潔不亦難乎攷其所錄十有二人如趙軌王伽等竝著節齊州所謂立嚴察之朝執心平允終行仁恕餘風遺愛沒而不忘者也舊志所載隋止三人舊通志載七人茲益以新通志邑乘共得十四人有隋一代宦蹟之在今郡屬者具此矣

隋

韋藝字世文京兆杜陵人周武帝時爲魏郡太守高祖初拜齊州刺史爲政清簡士庶懷惠在職數年遷營州總管番人畏懼開皇十五年卒官諡曰康

樊子蓋字華宗廬江人解褐武興王行參軍出爲慎縣令東海北

陳二郡太守高祖受禪拜辰州刺史轉嵩州刺史母憂去職未幾起授齊州刺史固讓不許臨民明察下不敢欺以善政聞轉循州總管

乞伏慧字令和馬邑鮮卑人少慷慨有大節齊文襄時爲行臺左丞高祖受禪拜曹州刺史歲餘轉齊州刺史得隱戶數千遷壽州總管煬帝卽位爲天水太守

張甯字文懿清河人家於淮陰以勇決知名起家州主簿高祖平陳之役頗有功焉歷齊州刺史有能名開皇十八年從征遼東仁壽中遷潭州總管在職三年卒

元襄字孝整河南洛陽人少有成人之量開皇二年拜安州總管徙原州總管煬帝卽位拜齊州刺史尋改齊郡太守爲政清簡

濟南府志

卷三十三

宦蹟一

三

吏民安之

趙軌河南雒陽人少好學有行檢周蔡王引爲記室以清苦聞遷衛州治中高祖受禪轉齊州別駕有能名其東鄰有桑葢落其家遣人悉拾還其主誠其諸子曰吾非以此求名意者非機杼之物不願侵人汝等宜以爲戒在州四年考績連最持節使者郤陽公梁子恭狀上高祖嘉之賜物三百段米三百石徵軌入朝父老相送者各揮涕曰別駕在官水火不與百姓交是以不敢以壺酒相送公清若水請酌一杯水奉餞軌受而飲之授原州總管司馬遷硤州刺史轉壽州總管長史秩滿歸卒於家

王伽河間章武人開皇末爲齊州行參軍初無足稱後被州使送流囚李參等七十餘人詣京師時制流人竝枷鎖傳送伽行至

榮陽哀其辛苦悉呼而謂之曰卿輩旣犯國刑虧損名教身嬰
縲紲此其職也今復重勞援卒豈獨不媿於心哉參等辭謝伽
曰汝等雖犯憲法枷鎖亦大辛苦吾欲與汝等脫去行至京師
總集能不違期不皆拜謝曰必不敢違伽於是悉脫其枷停援
卒而去流人咸悅依期而至一無離叛上聞而驚異之召見與
語稱善久之於是悉召流人并令攜負妻子俱入賜宴於殿庭
而赦之擢伽爲雍令政有能名

房恭懿字慎言河南洛陽人性深沉有局量達於從政開皇初尚
書蘇威薦之授新豐令政爲三輔最時雍州諸縣令每朔朝謁
上見恭懿必呼至榻前訪以理人之術超授澤州司馬遷德州
司馬在職歲餘盧愷復奏政爲天下之最上甚異之謂諸州朝

濟南府志

卷二十三

宦蹟一

三

集使曰如房恭懿志存體國愛養我百姓此乃上天宗廟之所
祐助豈朕寡薄能致之乎朕卽拜爲刺史豈止爲一州而已當
令天下模範之卿等宜師敷也遷海州刺史

公孫景茂字元蔚河間阜城人在魏舉孝廉射策甲科歷高唐令
大理正濟北太守俱有能名開皇初徵入朝訪以政術拜汝南
太守轉曹州司馬遷息州刺史十五年文帝幸洛陽景茂謁見
時年七十七命升殿坐問進儀同三司伊州刺史轉道州刺史
其後請致事優詔聽之仁壽中上明公楊紀出使河北見景茂
神力不衰還奏就拜淄州刺史賜以馬輦便道之官前後歷職
皆有德政論者稱爲良牧及卒數州吏民赴喪者數千人諡曰

康祀名宦

劉宏字仲遠彭城叢亭里人魏太常卿芳之孫也少好學有行檢重節槩任齊行臺郎中文帝初授齊州長史志在立功不安佐職平陳之役表請從軍以行軍長史渡江以功加上儀同封獲澤縣公拜泉州刺史

張須陁宏農閩鄉人性剛烈有勇略大業中爲齊郡丞會興遼東之役百姓失業又屬歲饑穀米踊貴須陁將開倉賑給官屬咸曰須待詔敕不可擅典須陁曰今帝在遠遣使往來必淹歲序百姓有倒懸之急如待報至當委溝壑矣吾若以此獲罪死無所恨先開倉而後上狀帝知之而不責也明年賊帥王薄聚結亡命數萬人寇掠郡境發兵拒之薄遂引軍南轉掠魯郡須陁躡之及於岱山之下出其不意擊之薄眾大潰斬首數千級追至臨邑復破之斬五千餘級賊攻章邱遣舟師斷其津濟親率馬步二萬襲擊大破之露布以聞帝大悅優詔褒揚令使者圖畫其形容而奏之以功遷齊郡通守領河南道十二郡黜陟討捕大使

王頒字景彥太原祁人少儻有文武幹局父僧辯爲陳武帝所殺開皇初獻取陳之策及大舉伐陳頒自請行及陳滅拜代州刺史後爲齊州刺史甚有惠政卒官

趙元淑京兆雲陽人性疎宕不事生產煬帝時以功進位柱國拜德州刺史尋拜潁川太守並有威惠

來整江都人榮國公護兒第六子武賁郎將右光祿大夫素驍勇善撫御士眾討擊羣盜所向皆捷諸賊甚懼之爲作歌曰長白

山頭百戰場十五五把長鎗不畏官軍十萬眾只畏榮公第
六郎字文化及反遇害

唐

按舊唐書良吏傳云太宗皇帝削平亂迹滌洗汚風唯思稼穡
之艱不以珠璣爲寶以是人知恥格俗尚貞修太平之基率由
茲道天后元宗之代貞元長慶之間或以卿士大夫泄方州或
以御史郎官宰畿甸行古道也所病不能自武德以還歷年三
百其閒岳牧不乏循良所冀表吏師而儆不恪也第舊書良吏
四十一人新書循吏二十三人事涉濟南者絕少惟張知謩舊
載良吏新書另爲立傳餘俱散見各傳之中舊志只載三人茲
據通志及各邑志所載質之劉歐二書共得十九人以補舊志

濟南府志

卷三十三

宦蹟一
隋唐

五

所未備焉

唐

權萬紀京兆萬年人太宗時爲齊州都督府長史剛直敢言初齊
王祐領齊州都督蒞羣小好弋獵帝數以書讓之萬紀謂祐曰
上欲王改悔故數教責王誠能飭躬引咎萬紀請入朝言之上
意宜解祐因上書謝罪萬紀見帝言祐且自新帝悅厚賜萬紀
而仍戒祐因萬紀見勞而已蒙責以爲賣已遂殺萬紀支解
之舉兵反平陵人不從曰奈何殺權長史祐平贈齊州都督武
督郡公諡曰敏

王志愔博州聊城人中宗時爲齊州都督後授齊州刺史破碎姦
猾令行禁信境內肅然

李傑本名務光相州滏陽人高宗時齊州參軍治事明敏案無留牘時人賢之

李隨元宗時爲濟南太守與單父尉賈賁濮陽人尚衡共起兵謀討安祿山聞顏真卿守平原遂悉眾歸之

杜祐字君卿京兆萬年人憲宗時以廕補濟南參軍爲人平易遜順明習典故勤於吏職而治不刻覈議者咸稱祐治行無缺遷蘇州刺史改饒州擢嶺南節度使拜司徒封岐國公致仕元和七年卒贈太傅諡曰安簡

徐彥伯名洪以字行兗州瑕邱人七歲能文武后時薛元超安撫河北表其賢對策高第調永壽尉蒲州司兵參軍時稱河東三絕遷宗正卿出爲齊州刺史以善政聞中宗復位改太常少卿

濟南府志

卷三十三

宦蹟一
唐

姜

翟修文館學士工部侍郎開元二年卒

狄光嗣梁國公仁傑之子聖歷初爲司府丞武后召宰相各舉尚書郎一人仁傑薦光嗣由是拜地官員外郎以稱職聞武后曰祁奚內舉果得人爲淄州刺史母喪奪爲太府少卿固讓睿宗嘉其誠許之累遷揚州長史貶歙州別駕卒

武懷運并州文水人武后異母兄子也先懷運父遇后禮薄及后得志以爲淄州刺史會封泰山懷運以岳牧來集從還京師遂遇害

曹全最淄州刺史昭宗時爲天平節度使兼東面副都統朱全忠遣其將韓簡寇鄆州全最死之

杜行敏高宗時爲淄青兵曹參軍齊王祐謀不軌行敏勒兵趨平

陵園宮門鑿垣而入祐拒門自朝至日中行敏令軍士積薪焚之祐乃出械送京師擢行敏巴州刺史

宋渾那州南和人右丞相璟之子元宗時爲平原太守御史吉温以私怨構之謫賀州時顏真卿爲殿中侍御史曰奈何以一時忿欲危宋璟後乎

李邕字泰和揚州江都人父善淹貫古今爲文選注顯慶中累擢宗賢館直學士兼沛王侍讀邕少知名旣冠假直秘書召拜左拾遺左臺殿中侍御史彈劾任職人頗懼之元宗卽位擢御史中丞出爲陳州刺史帝封泰山詣獻辭賦帝悅會仇人告邕枉法下獄許昌男子孔璋上書救之減死貶遵化尉開元二十三年起爲括州刺史歷淄滑二州刺史重義愛士上計京師後生

濟南府志

卷三十三

宦蹟一

乘

望風內謁門巷填隘中人臨問索所爲文章且進上出爲汲郡北海太守天寶中爲李林甫所忌因傳以罪詔刑部員外祁順之等就郡杖殺之時年七十代宗時贈秘書監邕雖詘不進而文名天下時稱李北海盧藏用嘗謂邕如干將莫邪難與爭鋒但慮傷軼耳後卒如言杜甫知邕負謗死作八哀詩讀者傷之韓思復字紹出京兆長安人篤學舉秀才高第永淳中調梁府倉曹參軍轉汴州司戶擢司禮博士遷郎中拜給事中開元初爲諫議大夫山東大蝗宰相姚崇遣使分道捕瘞遣思復至山東按所損還以實言出爲德州刺史性恬澹不喜爲繩察仁恕不行鞭罰累遷吏部侍郎卒諡曰文

韋安石京兆萬年人曾祖孝寬高祖時爲陵州刺史安石舉明經

調乾封尉雍州長史武后時擢膳部員外郎遷并州司馬有善政陟德州刺史性方重不苟言笑其政尚清嚴而心存忠恕吏民畏而懷之遷文昌右丞後封勛國公

顏真卿字清臣瑯琊臨沂人五代祖之推北齊黃門侍郎真卿少勤學業有詞藻尤工書開元中舉進士登甲科事親以孝聞四命爲監察御史充河西隴右軍試覆屯交兵使又充河東朔方使遷殿中侍御史東都畿採訪判官轉侍御史武部員外郎出爲平原太守安祿山逆節頗著真卿以霖雨爲託修城浚池陰料丁壯儲廩實乃陽會文士泛舟外池飲酒賦詩或譏於祿山密偵之以爲書生不足虞也無幾祿山反河朔盡陷獨平原城守具備乃使司兵參軍李平馳奏之元宗初聞祿山之變歎曰

濟南府志

卷三十三

官蹟一
唐

老

河北二十四郡豈無一忠臣乎得平來大喜顧左右曰朕不識顏真卿形狀何如所爲得如此祿山初尚移牒令以平原博平軍屯七千人防河津以博平太守張獻直爲副乃募勇士旬日得萬人遣錄事參軍李擇交統之簡閱以刁萬歲和琳徐浩等爲將祿山旣陷洛陽殺留守李愷御史中丞盧弈判官蔣清三人遣段子光以三首徇河北真卿謂諸將曰我識此三人首皆非也遂腰斬子光異日乃爲位慟哭人心益附祿山遣將李欽湊高邈何千年等守土門真卿從父兄常山太守杲卿謀殺湊等擒千年送京師土門旣開十七郡同日歸順共推真卿爲帥得兵二十餘萬橫絕燕趙詔加戶部侍郎依前平原太守清河客李萼與郡人來乞師借兵千人乃移牒清河等郡遣大將李

擇交副將平原縣令范東馥裨將和琳徐浩進兵與清河四千人合勢而魏郡袁知泰遣將拒戰大敗之斬首萬餘級肅宗幸靈武授工部尚書兼御史大夫河北採訪招討使祿山遣史思明等攻河北諸郡相次陷沒獨平原博平清河三郡城守然人心危盪不可復振至德元年十月棄郡渡河歷江淮荆襄二年四月朝於鳳翔授憲部尚書加御史大夫中書舍人兼吏部侍郎軍國之事知無不言出爲同州刺史代宗卽位拜利州刺史遷戶部侍郎檢校刑部尚書知省事封魯郡公德宗立改太子太師李希烈陷汝州盧杞爲相奏令往諭遂遇害諡曰文忠按副將平原縣令范東馥新唐書作副將范冬馥刪去平原縣令四字冊府元龜繫平原令銜亦作冬馥未知孰是

濟南府志

卷三十三

宦蹟一
唐

宋

張知謩字匪躬幽州方城人兄弟五人皆明經高第曉吏治清介有守公卿爭爲引重嗣聖初擢監察御史爲德州刺史甚有聲譽前後凡刺十一州所莅皆有威嚴武后降璽書存問萬歲通天中自德州入許后奇其貌詔工圖之稱其兄弟容而才謂之兩絕又門皆列戟白鶴巢其廷中宗復位拜左衛將軍加雲麾將軍封范陽郡公

劉文恪歷城令有清德高宗總章二年吏民刻石頌之

張公謹字宏慎魏州繁水人初爲王世充洺州長史高祖武德元年與王世充所署洺州刺史崔樞以州城歸國授鄒州別駕累除右武侯長史貞觀元年拜代州都督封鄒國公卒諡曰襄

劉敬和德宗時嘗歷鄒平淄川長山三縣令清慎愛民號爲良牧

後徙高苑每遇饑年輒開倉賑濟就食者皆活之民歌曰高苑之樹枯復榮淄川之水渾復清長白之山草復青鄒平之民仆復行立碑於縣署前

陽嶠其先北平人徙雒陽舉八科皆中高宗儀鳳中調將陵尉累遷詹事司直長安中擢右臺御史遷國子司業謹飭好學誘勸後生睿宗立進尚書右丞出爲涇州都督魏州刺史荊州長史本道按察使率以清白聞入爲國子祭酒封北平縣伯常語人曰吾雖備位方伯而心亦昔時一尉耳以老致仕卒諡曰敬

按唐元和郡縣志德州管縣七其四曰將陵縣隋開皇十六年置唐因之今德州境

五代

濟南府志

卷三十三 宦蹟一

完

按歐陽氏五代史云孟子謂春秋無義戰予謂五代無全臣非無一人蓋僅有之耳其仕不及於二代者各以其國繫之其餘仕非一代之臣未必皆可貴也舊志於後五代所載不過四人茲據通志及各邑志所載質之薛歐二史彙而錄之共得一十二人而自梁至周五十三年之治績可傳者略具於此矣

五代

朱珍徐州豐人梁太祖時淄州刺史威惠素著時秦宗權屢困梁太祖以兵少憂甚珍募兵於淄青間得萬餘人太祖大悅遂却宗權時以珍功爲第一威振河朔

楊師厚潁州斤溝人梁太祖時爲曹州刺史梁攻王師範師厚戰

臨朐擒其偏將八十餘人取棣州以功拜齊州刺史後以攻襄陽功拜山南東道節度使末帝卽位封鄴王

張錫福州閩縣人梁末爲棣州軍事判官後爲淄川令不畏強禦專務愛民刺史有所徵不答由是銜之及代白其事於宰相馮道道知錫介直卽奏召爲監察御史歷晉漢周竝以清節聞宋初改給事中錫無子范質以兄事之館於別墅

高霸梁太祖乾化中任淄州刺史值歲旱禱雨顏文姜祠有應

劉遂清密州安邱人唐明宗時歷棣州刺史有善政後爲淄州刺史迎養其母及郊親執轡行數十里州人咸感其孝

顏衍字祖德兗州曲阜人唐明宗天成中爲鄒平令苻習初鎮天平以書告屬邑母聚斂爲獻賀衍未領旨以故規行之爲吏所

濟南府志

卷三十三

官蹟一
五代

三

訟習遽召衍笞之旣而悔焉表爲觀察推官長興初召拜太常博士習力奏留之官至工部尚書

翟進宗初事唐後事晉爲淄州刺史時張萬迪爲登州刺史天福八年平盧節度使楊光遠反以騎兵數百脅取二刺史至青州萬迪聽命而進宗獨不屈遂見殺及光遠平詔求進宗尸淄人爭欲葬之出帝時贈左武衛將軍以其子欽爲供奉官

郭瓊平州盧龍人仕漢爲沂州刺史嘗單騎諭賊賊皆解散周世宗聞其賢以爲齊州防禦使尊禮儒士存恤孤寡歲饑出已俸以助賑民懷其惠咸詣闕頌德政詔許立碑

許仲宣字希粲青州人漢乾祐中進士周顯德初以張乂薦任淄州團練判官宋初赴調引對便殿仲宣氣貌雄偉太祖悅之授

太子中允詔知北海軍

張藏英范陽人周世宗時德州刺史嘗上書陳邊務請於深州李
宴口置砦及誘境上亡命者以隸軍願爲主將得便宜擊討世
宗悉納之藏英遂築城李宴口募得勁兵數千會節度使王彥
超巡邊爲契丹所圍藏英率親募兵往擊之契丹遁去圍乃解
後改濮州刺史

張德昇清河人周顯德三年任章邱縣令達於政事妙有神機邑
內舊有妖巫和孃祠常有狡徒思利妄爲禍福之言淄齊德棣
之人相率而來喧闐如市乃召其佐吏而告之以五弊救丁壯
具畚鍤至祠所毀之遂以便宜陳於郡府時權知軍州事張遂
元偉其英斷以狀聞上稱歎優詔從之乃延寓賓前碭縣令鮮

濟南府志

卷二十三

宦蹟一
五代

三

于迴滄州司戶孫良弼處士李芳三人共爲義教咸謂生我者
父母訓我者明府也三載考績復留葺歲士民感惠立碑記德
進士戰孚遠爲之記

梁進官沿河巡檢晉開運元年契丹將麻答陷德州進以鄉社兵
復之

濟南府志卷三十四

宦蹟二

宋 宦蹟

按宋史循吏傳云宋法有可以得循吏者三一曰簡擇之道精二曰考課之方密三曰防閑之令嚴然有宋一代始終三百餘年循吏止十二人者蓋自州縣課最他日遂爲名臣則撫字之長又不足以盡其平生也舊志所載宦蹟在濟南者於宋計二十二人第所取不外宋史列傳而其事實往往摘錄數語至出身何階仕至何官一概從畧闕者不無遺憾茲取宋史本傳撮其大綱俾首尾粗具諡號崇祀亦與秩官祠廟相應合通志與歷城各邑志彙而錄之共三十有八人較舊志爲詳備矣

濟南府志

卷三十四

宦蹟二

宋

宋 宦蹟

李漢超雲州雲中人宋初累遷控鶴左廂都校領恩州團練使從平李重進尋遷齊州防禦使兼關南兵馬都監在郡十七年政平訟理吏民愛之詣闕求立碑頌德太祖詔率更令徐鉉撰文賜之太平興國初遷應州觀察使判齊州仍爲關南巡檢二年八月卒於屯所贈太尉忠武軍節度中使祀名宦

曾鞏字子固建昌南豐人嘉祐二年進士第調太平州司法參軍召編校史館書籍遷館閣校勘集賢校理爲實錄檢討官出通判越州治齊州其治以疾姦急盜爲本曲堤周氏擁貲雄里中子高橫縱賊良民汙婦女服器上僭力能動權豪州縣吏莫敢詰鞏取直於法章邱民聚黨村落間號霸王社權剽奪囚無不

如志鞏配三十一人又屬民爲保伍使譏察其出入有盜則鳴鼓相援每發輒得盜有葛友者名在捕中一日自出首鞏飲食冠裳之假以騎從鞏所購金帛隨之夸徇四境盜聞多出自首鞏外視章顯實欲攜貳其徒使之不能復合也自是外戶不閉河北發民濬河調及它路齊當給夫二萬初按籍三丁出一夫鞏括其隱漏至於九而取一省費數倍又弛無名渡錢爲橋以濟往來徙傳舍自長清抵博州以達於魏凡省六驛人皆以爲利徙襄州洪州加直龍圖閣知福州徙明臺滄三州神宗召見留判三班院拜中書舍人尋掌延安郡王牋奏丁母艱去又數月而卒年六十五祀名宦

李常字公擇南康建昌人熙寧初擢第爲秘閣校理通判滑州知

濟南府志

卷二十四

宦蹟二

二

鄂州徙湖齊二州齊多盜論報無虛日常每得黠盜輒刺爲兵使在麾下因盡知其囊括處悉發屋破柱拔其根株半歲間誅七百人姦無所匿歲餘盜盡絕徙淮南西路提點刑獄元豐六年召爲太常少卿遷禮部侍郎仕至御史中丞加龍圖閣直學士祀名宦

李兌字子西許州臨潁人登進士第由屯田員外爲殿中侍御史按齊州叛卒獄成有欲夜篡囚者兌以便宜斬之人服其畧仕至工部尙書卒諡曰莊

范純仁字堯夫蘄州吳縣人仲淹次子皇祐元年進士第神宗時知信陽軍移知齊州齊俗兇悍人輕爲盜劫或謂此嚴治之猶不能戢公一以寬恐不勝其治矣純仁曰寬出於性若強以猛

則不能持久猛而不久以治兇民取玩之道也有西司理院鑿
因常滿皆屠販盜竊而督償者純仁曰此何不保外使輸納耶
通判曰此釋之復紊官司往往待其以疾斃於獄中是與民除
害耳純仁曰法不至死以情殺之豈理也耶盡呼至庭下使自
新釋之且寬其限及期力不能償者復自請就繫純仁曰使汝
爲良民吾何惜代償免之去羣盜感愧相戒毋得再犯期歲盜
減比年大半丐罷提舉西京留司御史臺仕至尙書右僕射兼
中書侍郎諡忠宣祀名宦

王吉甫字邦憲同州人舉明經練習法律爲大理評事神宗時知
齊州廉介不同一於用法而無緣飾累官知同邢漢三州以中
大夫卒年七十祀名宦

濟南府志

卷二十四

宦蹟二
宋

三

晁補之字無咎濟州鉅野人太子少傅迥五世孫宗慤之曾孫也
舉進士試開封及禮部別院皆第一元祐初召試除秘書省正
字遷校書郎以秘閣校理通判揚州召還爲著作佐郎章惇當
國出知齊州羣盜晝掠塗巷補之默得其姓名囊橐皆審一日
宴客召賊曹以方畧授之酒行未竟悉擒以來一府爲徹警坐
修神宗實錄失實降通判應天府亳州又貶監處信二州酒稅
徽宗立召拜吏部員外郎禮部郎中兼國子編修實錄檢討官
黨論起出知河中府徙湖州密州果州還家自號歸來子卒年
五十八祀名宦

王巖叟字彥霖大名清平人鄉舉省試廷對皆第一哲宗時以直
集賢院知齊州先是巖叟嘗言河北權監法尙行民受其弊至

是請以所言鹽法行之京東尋召爲起居舍人仕至吏部侍郎
端明殿學士司馬光稱其進諫無隱必行其言而後已祀名宦
唐義問字士宣江陵人介之子元祐中知齊州提點京東刑獄河
北轉運副使屬臣尉因捕盜誤遺火盜逸去民家被焚訟尉故
縱火守執尉抑使服義問辨出之方旱而雨進直龍圖閣以集
賢殿修撰知廣州

游酢字定夫建州建陽人以文行知名程頤見之京師謂其資可
以進道第進士調蕭山尉召爲太學錄遷博士知河陽縣范純
仁守潁昌府辟府教授授純仁入相復爲博士僉書齊州判官
晚得監察御史歷知漢陽軍和舒濠三州而卒祀名宦

趙師民青州臨淄人九歲能屬文舉進士孫奭辟領諸城主簿夏

濟南府志

卷二十四

宦蹟二
宋

四

疎稱爲盛德君子仁宗時爲齊州推官性極慈恕勤於吏治有
惠政更天平郡節度推官仕至龍圖閣直學士知耀州三遷刑
部郎中領宗正歐陽修稱爲醇儒碩學云祀名宦

蘇轍字子由眉州眉山人年十九與兄軾同登進士科授商州軍
事推官時父洵被命修禮書兄軾僉書鳳翔判官轍乞養親京
師三年軾還轍爲大名推官逾年丁父憂服除神宗立己二年
轍上書言事召對延和殿時王安石出青苗書使轍熟議轍曰
以錢貸民使出息二分本以救民非爲利也然出納之際吏緣
爲奸恐不勝煩矣以爲河南推官三年授齊州掌書記沈靜簡
潔以文學鳴於時又三年改著作佐郎謫監筠州鹽酒稅哲宗
立以秘書省校書郎召元祐元年爲右司諫進戶部侍郎六年

拜尚書右丞進門下侍郎落職知汝州再知袁州徽宗卽位復
大中大夫致仕築室於許號潁濱遺老致和二年卒年七十四
追復端明殿學士淳熙中諡文定祀名宦

張叔夜字嵇仲開封人侍中耆孫也少喜言兵以蔭爲蘭州錄事
參軍召爲秘書少監擢中書舍人加直學士知濟南府山東羣
盜猝至叔夜度力不敵謂僚吏曰若束手以俟援兵民無噍類
當以計緩之使近三日吾事濟矣乃取舊赦賊文俾郵卒傳至
郡盜聞果小懈叔夜會飲譙門示以閒暇遣吏諭以恩旨盜狐
疑相持至暮未決叔夜發卒五千人乘其惰擊之盜奔潰追斬
數千級以功進龍圖閣直學士知青州靖康從駕至白溝河絕
粒而死諡忠文祀名宦

濟南府志

卷二十四

官蹟二
宋

五

李若水字清卿洛州曲周人元名若冰上舍登第調元城尉平陽
府錄事徽宗時爲濟南教授課士規條嚴簡而多厲激厲大觀
中試天下學官第一除大學博士靖康時官至禮部侍郎隨駕
北狩死之贈觀文殿學士諡忠愍

董儲安邱人以大常丞爲歷城知縣天聖十年安肅軍觀察留後
陳堯咨等議開新濟合鄆州中都平陰壽張陽穀東阿及歷城
三萬人歷城開五十里儲與鄆州通判張舜元等六人自謀始
至成功皆與焉先是黃河溢并濟爲一河水復而濟失故道乃
停於鄆州西南爲大澤作民患三十年至是復入於海景祐元
年石介爲文記其事後以郎中知鄆州

施辯常州人熙寧元豐間爲歷城令嘗修樂源石橋蘓轍爲文記

之後歸常州轍作詩送之有云高人不受塵土侵又云乘時歛
散逐十二鞭撻逋負徒哀矜亦可以想見其概矣

盧錫圭淄川人太平興國八年進士解褐歷城主簿歷大理評事
知安吉縣三遷太常丞通判并州加太常博士咸平二年選爲
開封府判官遷工部員外郎再爲河北轉運使勤吏職所至以
幹集聞頗知命嘗曰官五品服三品天不與者壽爾卒年五十
九

賈同字希得青州臨淄人初名罔字公疎篤學好古著山東野錄
七篇年四十餘同進士出身真宗命改今名王欽若方貴盛欲
致之固謝不往居八九年始補歷城主簿張知白薦爲大理評
事通判兗州天聖初上書言宜明忠邪美惡之分再遷殿中丞

濟南府志

卷三十四

宦蹟二
宋

六

知棣州卒門人諡曰存道先生

趙不羣字介然太宗六世孫徽宗時任章邱縣令當山東河北之
衝時有寇警不羣募五千人增城浚濠爲戰守之備當靖康之
初金人攻圍兩月不能下後遷濰州通判仕至兩浙路轉運副
使卒於官

王仲寶高密人仁宗時任章邱縣尉以捕盜六十餘人有功改左
班殿直累遷濮州團練使前後紀功十餘次以武幹顯名終左
屯衛大將軍

范正辭字直道齊州人登第調安陽主簿開寶中遷國子監丞改
著作佐郎治通欠於淄州轉運使稱其能轉左贊善大夫就知
淄州太宗征河東諸州部糧多不及期正辭所部長山縣吏張

秀督民輸受錢二千卽杖殺之郡中畏服太平興國中改殿中丞任至膳部郎中大中祥符三年卒

尹崇珂秦州天水人徙居大名宋初出爲淄州刺史有善政民詣闕請刻石頌德太祖命殿中侍御史李穆撰文賜之乾德中遷保信軍節度使卒贈侍中祀名宦

王貴并州太原人太平興國二年爲淄州刺史受詔從潘美北征頗立戰功及從楊業爲遼兵所圍親射殺數十人矢盡張空拳又擊殺數人遂遇害年七十三擢其子文晟文昱

楊澈字曼如建陽人徙北海營陵建隆初累遷至右贊善大夫知淄州事親以孝聞求便侍養徙通判青州三遷祠部員外郎復知淄州循聲更著

濟南府志

卷三十四

宦蹟一
宋

七

馬牙字東玉淮南人元祐中知淄州以放生爲事民皆化之平日未嘗以私怒笞責一人崇寧元年端坐而逝

向宗道哲宗時以職方郎中知淄州修建學宮廣生徒學舍肄業其中者月給廩餼士風以振

韓琦字稚圭相州安陽人仁宗時舉進士授將作監丞通判淄州留心民事卓有政行凡所咨謀預儲經濟入直集賢院後爲慶歷賢相兩朝顧命定策元勳封魏國公諡忠獻祀名宦

趙彥若哲宗時淄州通判民有犯法當死而其親已老爲其子乞命甚哀彥若矜之曰在律親年九十無侍養者聽讞奏請上果可其奏竟得減死

范諷字補之齊州人正辭之子以蔭補將作監主簿舉進士第遷

大理評事通判淄州歲旱蝗他穀皆不立民以蝗不食菽猶可
藝而患無種諷行縣至鄒平發官廩貸民縣令爭不可諷曰有
責令無預也卽出貸三萬斛比秋民皆先期而輸徙知梁山軍
以母老不行得通判鄆州擢天章閣待制出知青州改翰林侍
讀學士給事中卒

劉潛字仲方曹州定陶人少卓逸有大志好爲古文以進士起家
爲淄州軍事推官嘗權知鄆州平陰縣事一日與客飲驛亭左
右忽報太夫人暴疾馳歸已不救矣潛抱母一痛而絕其妻見
潛死撫潛屍大號而卒時人傷之曰子死孝妻死義孝義之事
併集其家

朱文翰景德初任淄州長史范文正公之繼父也初爲平江府推

濟南府志

卷三十四

宦蹟二
宋

八

官後以公貴南郊封典贈太常博士子弟以蔭補官者三人

張蘊齊州歷城人咸平時爲淄州兵馬監押二年冬契丹舉國入
高陽關縱橫大掠南至河乘堅冰侵淄齊時河南州郡未嘗治
城且無戰卒四郊之民驅戮向盡城中大懼刺史暨宦屬州人
咸欲奔於南山蘊按劍作色曰奈何棄城隍委府庫大眾一潰
更相勦奪彼敵未至吾民已殘矣刺史果出我當殺之以狗彘
是眾無敢動乃呼民登城夙夜以守數日敵退州人相賀曰向
非張公英識獨斷則吾輩父母妻子魚肉於人矣郡守掠爲己
功反陷以罪蘊受而不校二子長曰揆次曰揆並以文學節行

稱

又按張蘊事宋史載揆傳中甚畧茲以縣志所載范文正公書

環州馬嶺夫子廟碑陰補之蘊蓋後爲環州兵馬監押也

翟大順紹聖中知長山縣事首創學宮興行教化

張待問仁宗時爲淄州長山縣主簿縣有盧伯達者與曹侍中利
用通姻復憑世廕大爲邑患縣令憚其勢莫敢與較張一日承
令乏適伯達以訟至庭卽數其累犯杖之未幾伯達之姪士倫
來爲本路轉運使人皆爲張危之或勸令自免去張曰盧公賢
者肯銜隙以害公正之吏乎了不嬰意一日士倫巡按至長邑
召張語之曰君健吏也吾叔賴君懲之今變節爲善士矣爲發
薦章而去

梁夢昇太祖時知德州廉幹清慎嘗發前刺史郭貴姦利事貴使
都軍頭領史珪言夢昇欺蔑貴奏上太祖怒曰夢昇本清強吏

濟南府志

卷三十四

宦蹟二

九

必貴所爲多不法爾且珪安得爲貴聞言乃以珪與貴付中書
條問而擢夢昇爲左贊善

靳懷德博州高唐人太平興國中以明法解褐歷虞部員外郎通
判莫州知德州咸平中契丹入寇懷德固守城壁又轉運使劉
通言其善政連有詔褒之徙知密州懷德本名湘素遊寇準之
門避其父名乃改名焉祀名宦

唐介字子方江陵人擢第爲武陵尉調平江令知莫州任邱縣通
判德州轉運使崔嶧取庫絹配民而重其估介留牒不下且移
安撫使責數之嶧怒數馳檄按詰介不爲動旣而果不能行入
爲監察御史直聲動天下知瀛州治平元年召爲御史中丞熙
寧元年拜參知政事數與王安石爭論薨年六十謚曰賢肅祀

趙挺之字正夫密州諸城人進士上第熙寧建學選教授登棣二州通判德州哲宗卽位賜士卒緡錢郡守臺而貪不時給士卒課持白梃突入府守趨避左右盡走挺之端坐堂上不動佯作不知狀徐呼庫吏使發錢盡給兵隨散留一二持梃者叱曰持梃豈可入公署汝非首謀敢毀後乎吾第杖之以儆士卒毋敢言眾遂定魏境河屢決議者欲徙宗臣縣轉運使檄挺之往視挺之云縣距高原千歲矣水未嘗犯今所遷不如舊必爲民害使者卒徙之財二年河果壞新城漂居民畧盡召試館職爲秘閣校理遷監察御史初挺之在德州希意行市易法黃庭堅監德安鎮謂鎮小民貧不堪誅求俄知楚州入爲國子司樂由

濟南府志

卷三十四

宦蹟一
宋

十

吏部尙書拜右丞進左丞中書門下侍郎加特進仍爲右僕射崇寧初以大學士使佑神觀卒諡清獻祀名宦

趙淑皎秦悼王四世孫爲德州兵馬都監靖康之難被圍凡六戰敵登城猶向上射之金人執之大罵不屈而死祀名宦

黃庭堅字魯直自號山谷道人洪州分寧人治平中舉進士調萊蕪縣尉熙寧初知太和縣以平易治吏不悅而民安之移監德平鎮酒稅提舉楊景芬欲於本鎮行市易法庭堅謂鎮小民貧不堪誅求若行市易法必至星散文移往來士人傳以爲笑景芬意阻乃止哲宗立召爲校書郎修神宗實錄除秘書著作佐郎紹聖初出知宣州改鄂州貶涪州別駕泊然不以遷謫介意徽宗卽位起知太平州以與執政趙挺之有隙除名羈管宜州

三年徙永州未聞命而卒祀德平名宦

按宋史文苑傳不載移監德平鎮事茲據縣志錄之

濟南府志

卷三十四

宦蹟一
宋

士

按金史循吏傳云太宗既有中原申畫封疆分建守令熙宗遣廉察之使循行四方世宗休養生息迄於明昌承安之間民物滋殖循吏迭出焉秦和用兵郡縣多故吏治衰矣第金史循吏二十一人濟南得五人如李瞻高昌福孫得淵趙鑑石抹元皆在循吏傳中而事蹟傳者四人而已茲以各志所載合之正史共得三十人金百餘年吏治始終可考正不以時代限也

金

李仲畧字簡之晏之子澤州高平人登大定十九年詞賦進士第調代州五臺主簿授左司都事上顧謂侍臣曰仲畧精神明健如後鶻脫帽健吏也章宗時爲山東東西路按察使剛介特立

濟南府志

卷三十四

宦蹟二
金

三

不阿權貴臨事明敏無留滯所任以幹濟稱云

張行信字信甫暉子行簡弟莒州日照人登大定二十八年進士第累官銅山令以廉擢監察御史泰和三年同知山東西路轉運使貞祐二年遷山東東路按察使兼轉運使仍權本路宣撫副使三年上書言四事曰山東軍儲皆鬻爵所獲及或持勅牒求仕選曹以等級有不當鬻者往往駁退夫鬻所不當有司罪也彼何責焉況海岱重地羣寇未平田野無所收倉廩無所積一旦軍餉不給復欲鬻爵其誰信之朝廷多用其議召爲吏部尚書仕至叅知政事

考證云按中州集傳行信作行中

賀揚庭字公叟曹州濟陰人天德三年經義進士調范縣主簿有

治聲累遷監察御史世宗謂之曰異時南人不習詞賦故中第者少近年河南山東中第者多殆漢人爲官俄以廉能遷戶部郎中章宗卽位授山東東西路提刑使揚庭性疾惡纖介不少容明昌改元詔入見親問所察事條曰爾何治之煩也明年夏除洛州防禦使改陝西路轉運使致仕卒

楊伯淵字宗之伯雄弟真定藁城人天會十四年賜進士第歷吏禮二部主事四遷山東東路轉運使正隆末羣盜蠡起州郡往往罹害獨濟南賴伯淵保全大定三年致仕卒於家

孫德淵字資深興中州人大定十六年進士由監察御史爲山東東路轉運副使審官院奏德淵剛正幹能可任繁劇遂再任貞祐二年拜工部尙書攝御史中丞是時山東乏兵食有司請鬻

濟南府志

卷三十四

官蹟二
金

七

恩例舉人居喪者亦許納錢就試德淵奏此大傷名教事遂寢尋致仕監察御史許古論其忠亮明敏可以大用宣宗嘉納未及用而卒

移刺益字子遷本名特末阿石中都路胡魯土猛安人初爲翰林修撰御史臺舉益剛正可任授霸州刺史承安二年邊鄙弗靖上召朝官入議益謂守爲便天子之兵當取萬全若王師輕出少有不和利非惟損大國之威恐啟敵人侵玩之心出爲山東西路轉運使有勅使按鷹於山東益奏乞止令調於近甸何必驚遠方耳目書聞上命有司治使者罪遷河東南北路按察使泰和二年卒於官

李上達字達道曹州濟陰人初爲東平府司戶叅軍累遷山東西

路轉運使歲課比舊增三十餘貫戶部以其法頒之鄰路上達長於吏事能治繁劇猾吏不能欺所至稱之卒於官

蒙古綱本名胡里綱咸平府猛安人承安五年進士貞祐三年知河間府事權河北東路宣撫使屯冀州軍食不足徙濟南權山東宣撫副使改山東路統軍使四年十月行元帥府事與定元年拜右副元帥叅知政事行尙書省二年詔曰卿以忠貞爲國捍難保完城邑朕甚嘉之可進官二階賜金帶一重幣十端三年奏曰濟南介山東兩路之間最爲衝要被兵日久雖與東平鄰接不相統屬緩急不相應乞權隸本路詔從之五年綱奏請移軍於河南詔許綱內徙改兼靖難軍節度使行省邳州自此山東事勢去矣元光二年八月爲邳州經畧使納合八哥所害

濟南府志

卷三十四

宦蹟二

古

移刺道本名趙三其先乙室部人寬厚有大志以篤孝著名通女直契丹漢字海陵謂侍臣曰道骨相異常他日必登公輔大定二年以戶部郎中安撫山東招諭盜賊民或避盜避役者並令歸業不問罪名輕重皆原之軍人不得並緣虜掠賊平遷翰林直學士詔往河北山東等路廉察善惡陞降官員毋受饋獻遷大理卿仕至尙書右丞平章政事封莘國公

完顏仲元本姓郭氏中都人貞元三年累功至永定軍節度使賜姓完顏氏兵最強號花帽軍改知濟南府事權山東東路宣撫副使山東乏糧仲元軍三萬欲於黃河之側分屯上書言恢復河朔之策仲元爲將沈毅有謀南渡後最稱名将云

完顏永元字惇禮本名元奴幼聰敏日誦千言皇統元年試宗室

子作詩中格善左氏春秋通其大義大定六年爲崇義軍節度使後爲保右軍節度使遷濟南尹北京副留守歷典大藩多知民間利害所至稱治

張萬公字良輔東平東阿人父彌學夢至一室榜曰張萬相公讀書堂已而萬公生因以名焉登正隆二年進士第調新鄭薄遷長山令時土寇未平一旦至城下者幾萬人萬公登陣諭以鄉里親舊意眾感悟相率而去邑人賴之爲立生祠久之補尙書省令史累遷御史中丞明昌四年知東平府事六年改知河中府移鎮濟南拜平章政事泰和六年南鄙用兵上以山東重地須大臣鎮撫之起知濟南府山東路安撫使上言督責有司禁戢盜賊之方從之致仕泰和七年薨諡曰文貞

濟南府志

卷三十四

官蹟二
金

五

完顏阿喜宗室子好學問襲父北京路管榷山猛安聽訟明決人信而愛之察廉能貞祐二年知大名府充宣差山東路左翼都提控尋知濟南府事仕至昌武軍節度使卒

石抹元字希明懿州路胡土虎猛安人宣宗時以監察御史同知淄州軍州事劇盜劉奇久爲民患一日捕獲方鞠訊而赦將至吏請亟迎詔抹元曰吾按賊亦朝廷詔也亟命杖殺之而後宣讀闔郡稱快改大興府判官累遷山東西路按察轉運使貞祐初移知濟南府到官六月卒生平寬言笑尙節儉居官有守不交權要人以此重其品比之泰山石云

按循吏傳云太宗命以三百戶爲謀克十謀克爲猛安一如郡縣置吏之法國語解云猛安千夫長謀克百夫長也

李好復字仲通安喜人明昌二年進士榆次令轉歷城令有能聲終滑州刺史

趙鑑字擇善濟南章邱人宋建炎二年進士調廬州司理叅軍棄官還鄉里齊國建除歷城丞轉長清令皆劇邑難治政聲甚著遷直秘閣提舉涇原路齊廢改山東路轉運副使攝行臺左司郎中行臺宰相欲以故宋宦者權都水監鑑曰誤國闔豈汴人視爲寇讐付以美官將失人望遂不用大定初知寧海軍仕至河北西路轉運使致仕卒

完顏問中都人承安元年由律科忠顯大夫任章邱令盡心治盜大著聲績

范天錫尊懷人由詞賦第泰和七年任章邱令豈弟慈善民皆懷

濟南府志

卷三十四

宦蹟二金

去

之

王儲中都人由詞賦第朝請大夫貞祐三年任章邱令有政事之

才

李仔宏興定二年任章邱令威信大行奸慝屏息

李山章邱人寶慶戊子任本邑令能保聚生齒

劉信大定八年由臺省出知齊河縣事勤以莅事信以使民訪諸耆舊修舉廢墜首築城垣數旬告成其他政務悉有矩度有進

士董相記

楊潤之直隸香河人大定二十二年以明律令中乙科明昌三年任齊河縣主簿長於吏治事雖繁難庭無滯訟邑無冤聲民懷

其德立石誦之

按金史世宗本紀天德二年爲濟南尹梁襄傳大定三年將
幸金蓮川時襄爲薛王府掾上書極諫曰燕京之涼非濟南
之比陛下牧濟南日每遇炎蒸不離府署今九重之內臺榭
高明宴安穆清何暑得到世宗納之遂爲罷行又范拱傳世
宗在濟南聞其名此皆言世宗爲濟南府尹事亦考古者所
宜知也

范拱字清叔濟南人宋末登進士第齊國建擢中書舍人齊廢梁
王宗弼領行省臺事訪求百姓利病拱以減稅爲請宗弼從之
減舊三分之一民始藉息以久病乞近郡除淄州刺史皇統四
年以通議大夫致仕

徒單繹本名朮輩其先上京人美姿儀通諸國語大定中由符寶

濟南府志

卷三十四

宦蹟二
金

七

耶爲淄州刺史有廉名尋同知濟南府事二十六年遷棣州防
禦使以政迹聞陞臨海軍節度使卒

梁昱初守兗沂觀察判官興定三年攝淄州刺史李全之亂昱率
軍民力田徵科有度糧餉不乏保全淄州土賊不敢發轉運使
田琢奏其功詔遷一官同知淄州事

孟奎字元秀遼陽人大定二十一年進士由黎陽主簿調任淄州
軍事判官杜絕奸弊州境遠近便焉遷汲縣令大安初爲山東
東西路安撫副使貞祐初卒諡莊肅

齊鷹揚淄州軍事判官貞祐初元兵取淄州鷹揚與屯留縣尉致
仕楊敏中淄州民張乞驢等募兵備禦城破率眾巷戰鷹揚等
三人創甚被執欲降之鷹揚伺守者稍怠卽起奮棗殺數人敏

中乞驢皆不屈以死詔贈鷹揚嘉議大夫淄州刺史仍立廟於淄州以時致祭敏中贈昭勇大將軍同知橫海軍節度使事乞驢特贈宣武將軍同知淄州軍州事

張諱字明仲莒州日照人博學該通正隆五年進士爲淄州酒稅副使課增羨遷昌樂令累官國子助教調山東東路轉運使任至安武軍節度使致仕與子行簡講論古今夜分乃罷歷太常禮部二十餘年最明禮學家法爲士族儀表

李瞻薊州玉田人遼天慶二年進士天會七年知寧州累遷德州防禦使爲政寬平民懷其惠相率詣京師請留者數百千人貞元三年遷濟州路轉運使大定初卒

曹望之字景蕭其先臨潢人移家宣德天會間以秀民子選充女

濟南府志

卷二十四

宦蹟二

六

直字學生賜進士及第大定初監修國史望之謂人曰栽花接木乃加爵命勤勞者不遷官張景仁遷翰林學士又曰止與他人便遣獨不及我哉世宗聞之以爲德州防禦使習練錢穀盡心職事有惠政百姓爲立生祠同知西京留守上書論便宜事召拜戶部尙書

王擴字充之中山永平人明昌五年進士調鄧州錄事潤色律令文字遷懷安令補尙書省令史除同知德州防禦使事被詔賑貸山東西路饑民棣州尤甚擴輒限數外給之秦和伐宋山東盜賊起被安撫使張萬公牒提控督捕擴行章邱道中遇一男子舉止不常捕訊果歷城大盜也覆以爲有神再遷監察御史遷汴後召爲戶部侍郎遷南京路轉運使行六部尙書致仕與

定三年卒諡剛毅

完顏弼本名遜吉不蓋州猛安人同知德州防禦使事至盛三年
改知東平府事山東西路宣撫副使是時劉二祖餘黨孫邦佐
張汝楫保濟南勤子堦弼遣人招之得邦佐書云我輩自軍興
屢立戰功主將見忌陰圖陷害竄伏山林以至今日實畏死耳
如蒙湔洗便當釋險面縛餘賊未降者保盡招之弼奏方今多
故此賊果定亦一事畢也乞明以官賞示之詔曰孫邦佐果受
招各遷五官職於是邦佐汝楫皆降

田庭芳秦和初爲德州教授時元妃李氏方寵幸兄喜兒有楊國
忠之權庭芳上書言事云大臣持祿近臣怙寵章宗顧謂輔臣
曰近臣怙寵者爲誰時喜兒侍立殿旁董師中倒笏指之曰莫
濟南府志

卷三十四

宣讀二
金

九

非謂李喜兒之屬否上領之

按此事載中州集傳而金史師中傳所載不同茲據考證錄
之

元 宦蹟

按元史良吏傳元初風氣質實與漢初相似世祖始立各道勸農使又用五事課守令以勸農繫其銜故當是時良吏班班可見亦寬厚之效也然良吏傳中所載一十八人惟田榮甫任濟南路總管又無事蹟可見豈報最之罕聞實搜羅之未廣茲博考羣書旁稽石刻取其政績卓然者監司以上勲業輝煌於史冊牧令以下謳思散見於碑銘彙而載之合九十有一人亦可補一代之良吏云爾

元 總部

撤吉思回鶻人世祖卽位授北京宣撫李璫叛命帥師從宗王哈必赤討之李璫伏誅哈必赤欲屠城力爭之曰王者之師誅止

濟南府志

卷三十四

宦蹟二

三

元惡魯從罔治因撫摩其人輟情大悅授山東行省都督遷經畧統軍二使兼益都路達魯花赤山東歲屢歉爲請於朝發粟賑卹又奏蠲其田租山東人刻石頌德卒贈安邊經遠宣惠功臣諡襄惠

尙文字周卿祁州深澤人後徙保定張文謙宣撫河東辟掌書記擢右直侍儀使進戶部郎中除行臺御史授河北河南肅政廉訪使大德三年調山東憲使歷行省叅知政事行御史臺中丞七年召拜中書右丞山東歲凶盜賊竊發出鈔八百五十餘萬實以賑之選十道使者奏請巡行天下問民疾苦十年拜昭文館大學士中書右丞商議中書省事泰安三年以中書平章政事致仕明年卒

蔡罕帖木兒字廷瑞系出北庭後家河南爲潁州沈邱人幼篤學
嘗應進士舉有時名居常慨然有當世之志至正十二年奮義
起兵授汝寧府達魯花赤朝廷奇其功除中書刑部侍郎十六
年陞中書兵部尚書十八年山東賊分道犯京畿詔以兵屯涿
州以功拜河南行省平章政事兼知河南行省行樞密院事陝
西行臺御史中丞二十一年謀知山東羣賊自相攻殺而濟寧
田豐降于賊乃遣書諭以逆順之理田豐王士誠皆降時大軍
猶未渡河羣賊皆聚于濟南而出兵齊河禹城以相抗乃分遣
奇兵取間道出賊後南略泰安北徇濟陽章邱自將大軍渡河
與賊將戰于分齊大敗之進逼濟南城而齊河禹城俱來降郡
邑聞風皆送款攻圍濟南三月城乃下詔拜中書平章政事知

濟南府志

卷三十四

宦蹟一
元

三

河南山東行樞密院事陝西行臺中丞如故二十二年山東俱
平獨益都未下至田豐營爲王士誠所刺贈推誠定遠宣忠亮
節功臣追封忠襄王諡獻武改諡忠襄所在立祠歲時致祭子
擴廓帖木兒總其父兵討賊取田豐王士誠之心以祭其父山
東悉平

姜彧字文卿萊陽人幼穎悟好學張榮守濟南辟爲掾陞左右司
知事尋遷郎中進叅議官中統三年與榮孫宏入朝因言益都
李璫反狀已露宜先其未發制之未報明年春璫果反襲據濟
南彧從榮招集散亡迎諸王哈必赤進兵討之捕得生口言城
中糧盡勢蹙乃請見王曰聞王陛辭時受詔曰發兵誅璫耳毋
及無辜今旦夕城且破王宜早諭諸將分守城門勿令縱兵不

然城中無唯類矣王曰汝言城破解陰陽耶或曰以人事知之若待城破言於王晚矣王悟明日賊眾開門出降王下令諸軍敢入城者論以軍法瓊就擒城中安堵如故以功授大都督府叅議累遷行臺御史中丞三十年卒

張惠字廷傑成都新繁人歲丙申惠年十四兵入蜀被俘至杭海居數年盡通諸國語丞相蒙速速愛而薦之入侍世祖藩邸以謹敏稱賜名兀魯忽訥特世祖卽位授燕京宣慰副使爲政寬簡遷侍中至元元年冬遷叅知政事行省山東以銀贖俘囚三百餘家爲民其不能歸者使爲僧建寺居之李瓊之亂山東民被軍士虜掠者甚眾惠至大括軍中悉縱之又奏選良吏去冗官以蘇民瘼遷制國用司副使會改爲尙書省拜叅知政事遷濟南府志

卷三十四

宣統二年

三

中書左丞進右丞伯顏伐宋詔主饋餉二十二年以平章政事行省杭州至無錫卒

董文炳字彥明真定藁城人俊之長子也以父任爲藁城令憲宗征南詔率義士四十六騎從行中統二年擢山東東路宣撫使三年李瓊反濟南瓊劇賊善用兵文炳會諸軍圍之瓊不得遁久之賊勢日蹙文炳曰窮寇可以計擒乃抵城下呼瓊將田都帥者曰反者瓊耳餘者卽吾人毋自取死也田縋城降李瓊之愛將旣降瓊遂亂禽瓊以獻瓊兵有漸漣西軍二萬餘人勇而善戰主將怒其與賊配諸軍使陰殺之文炳當殺二千人言于主將曰彼爲瓊所脅耳殺之恐乖天子仁聖之意向天子伐南詔或妄殺人雖大將亦罪之是不宜殺也主將從之然他殺之

者已眾皆大悔壇伏誅山東猶未靖乃以文炳爲山東東路經畧使率親軍以行出金銀符五十有功者聽與之所部大悅山東以安七年改山東路統軍副使治沂州十年拜叅知政事十五年九月卒贈金紫光祿大夫平章政事諡忠獻

董文蔚字彥華俊之次子也元初授彙城等處行軍千戶中統三年李壇反據濟南文蔚以麾下軍圍其南面力戰城破壇誅奏功還至元五年卒於上都之炭山贈隴西郡伯

董文用字彥材俊之三子弱冠試詞賦中選世祖在潛藩命主文書講說帳中中統元年中書左丞張文謙宣撫大名等路奏文用爲左右司郎中二年八月以兵部郎中叅議都元帥府事三年李壇叛據濟南從元帥闊闢帶統兵誅之山東平奉詔伐宋

濟南府志

卷三十四

宣統二年

三

謝病不行八年立司農司授山東東西道巡行勸農使山東自更叛亂野多曠土文用巡行勸勵無閒幽僻五年之閒政績爲天下勸農使之最十六年受代歸十九年召爲兵部尙書二十年拜御史中丞遷翰林學士承旨大德元年上章請老請卒諡忠穆

勃古思右丞相鎮海之子怯烈臺氏從世祖征花馬大理率兵千人結浮橋于金沙江以濟師中統初論功授益州等路宣撫使賜金虎符玉帶二年改東平路副達魯花赤討平叛寇尋遷濟南等路宣慰至元二年遷南京路達魯花赤四年討平贛縣叛民以病乞請事歸老於家

董搏霄字孟起磁州人由國子生辟陝西行臺掾除涇陽縣尹入

爲戶部主事陞員外拜監察御史累遷浙東宣慰副使至正十一年除濟寧路總管十七年毛貴陷益都般陽等路有旨命搏霄從知樞密院事上蘭奚討之而濟南又告急乃提兵援濟南賊眾自南山來攻濟南望之兩山皆亦搏霄按兵城中先以數十騎挑之賊眾悉來鬪騎兵少卻至礮上伏兵起遂合戰城中兵又大出大破之而般陽賊復約泰安之黨踰南山來襲濟南搏霄列兵城上弗爲動賊夜攻南門獨以矢石禦之黎明乃默開東門放兵出賊後既旦城上兵皆下大開南門合擊之賊敗走復追殺之賊眾悉無遺者於是濟南始寧詔就陞淮南行樞密院副使兼山東宣慰使都元帥仍賜上尊金帶楮幣名馬以勞之有疾其功者譜於總兵太尉紐的該令依前詔從上蘭奚

濟南府志

卷二十四

宣慰一
元

十四

同征益都搏霄卽出濟南城屬老且病請以其弟昂霄代領其眾朝廷從之未幾命守河間之長蘆十八年以兵北行且曰我去濟南必不可保既而濟南果陷方駐兵南皮奉詔拜河南行省右丞甫拜命毛貴兵已至而營壘猶未完因拔劍督兵以戰而賊眾突至刺殺之無血惟見白氣衝天昂霄亦死之事聞贈宣忠守正保節功臣追封魏國公諡忠定祀名宦

關關不花按攤脫脫里氏爲人魁岸有膂力以善射知名歲庚寅太祖命太師木華黎伐金分探馬赤爲五部各置將一人關關不花爲五部前鋒都元帥所向莫能支然不嗜殺故所至無殘破略定棗嶺諸州歲丙申太宗命五部將分鎮中原關關不花鎮益都濟南探察兒鎮平陽太原字羅鎮真定皆乃台鎮大名

怯烈台鎮東平括其民匠得七十二萬戶以三千戶賜五部將
闡闡不花得分戶六百立官治其賦得薦置長吏歲從官給其
所得五戶絲以疾卒官

陳祐一名天祐字慶甫趙州寧晉人少好學長遂博通經史元初
爲河南府總管上便民三十餘事朝廷皆從之以清慎見稱至
元六年置提刑按察司首以祐爲山東東西道提刑按察使朝
廷大舉伐宋遣祐僉軍山東民多逃匿聞祐來皆曰陳按察來
必無私遂皆出應期而辦十二年授南京總管兼開封府尹十
四年遷浙東道宣慰使行省遣祐檢覆慶元台州民田還至新
昌爲盜所害贈推忠全義功臣行中書省左丞追封河南郡公
諡忠定民立祠祀之祐能詩文有節齋集子夔請復父雙擒其

濟南府志

卷三十四

宦蹟一
元

壹

賊魁戮於紹興市

陳天祥字吉甫趙州人祐之弟自益晉徙家洛陽中統三年李璫
叛據濟南河北河南宣慰司承制以天祥爲千戶屯三汊口防
邊宋兵事平罷歸居偃師號樸山先生至元十一年起家招討
司經歷十三年知興國軍事凡所設施皆合眾望二十一年拜
監察御史三十年授燕南河北道廉訪使元貞元年改山東東
西道廉訪使時盜賊羣起山東居多詔求弭盜方略天祥上奏
曰古者盜賊之起各有所因除歲凶饑饉誘之天時宜且勿論
他如軍旅不息工役薦興聚斂無厭刑法紊亂之類此皆羣盜
所起之因中閒保護存養之者赦令是也赦者小人之幸君子
之不幸一歲再赦善人喑啞前人之備矣彼張梁之徒各執

兵杖殺人取後不顧其生有司盡力以擒之朝廷加恩以釋之
且脫縲囚暮卽行劫又復督勒有司給限追捕賊皆經慣習以
爲常旣不感恩又不畏法兇殘悖逆性已頑定誠非美化能移
惟以嚴刑可制所擬事條皆切於時用於是嚴督有司捕得盜
賊甚眾皆杖殺之由是東方羣盜屏息大德六年陞河南行臺
御史中丞七年召拜集賢殿大學士商議中書省事八年移疾
謝去延祐三年卒贈推忠正義全德佐理功臣追封趙國公諡
文忠

何榮祖字繼先其先太原人徙家廣平何氏世業吏累遷中書省
掾擢御史臺都事始折節讀書日記數千言除治書侍御史陞
侍御史出爲山東按察使有帖木刺思者以貪墨爲僉事李唐

濟南府志

卷二十四

宦蹟一
元

美

卿所劾帖木刺思計無所出適濟南有上變告者唐卿察其妄
取訟牒焚之帖木刺思乃撫取爲辭告唐卿縱反者逮繫數千
人獄久不決詔榮祖與左丞郝禎參政耿仁傑鞠之榮祖得其
情欲抵告者罪禎仁傑議以失口亂言之罪坐之榮祖不可俄
遷河南按察使二執政竟以失口亂言杖其人而株連者俱得
釋唐卿之誣遂曰又拜御史中丞復出爲山東東西道按察使
召入爲尙書參知政事以病告特授集賢大學士未幾起爲尙
書右丞改中書右丞奏行所定至元新格請改提刑按察司爲
肅政廉訪司而立監治之法尋拜昭文館大學士卒贈大司徒
追封趙國公諡文憲

徐世隆字威卿陳州西華人嚴實招致東平幕府傳掌書記中統

元年擢燕京等路宣撫使至元元年遷翰林侍講學士兼太常卿朝廷大政諮訪而後行七年遷吏部尚書十四年起爲山東提刑按察使時有妖言獄所司逮捕凡數百人世隆剖析誣誤者十八九悉縱遣之十五年移淮東十七年召爲翰林學士又召爲集賢學士皆以疾辭年八十卒著有瀛州集百卷

胡祜道字紹開磁州武安人中統初張文謙宣撫大名辟員外郎明年入爲中書詳定官至元元年授應奉翰林文字尋兼太常博士調戶部員外郎轉右司員外郎尋兼左司時阿合馬當國進用羣下官冗事煩建言省官莫如省吏省吏莫如省事以是忤權奸出爲太原路治中兼提舉本路鐵冶以最聞改河東山西道提刑按察副使十九年爲濟寧路總管上八事於樞府著

濟南府志

卷三十四

宦蹟二

毛

爲定法以最稱陞山東東西道提刑按察使所至抑豪右扶寡弱以敦教化以厲士風民有父子兄弟相訟者必懇切諭以天倫之重不獲已則繩以法召拜翰林學士不赴改江南浙西道提刑按察使以疾歸三十年卒贈禮部尚書諡文靖

蓋苗字耘夫大名元城人延祐五年登進士第授濟寧路單州判官五辟御史臺掾除山東廉訪司經歷歷禮部主事擢江南行臺監察御史至正四年由都水監遷刑部尚書出爲山東廉訪使民饑爲盜所在羣聚乃上救荒弭盜十二事劾宣慰使骫骳不法者有司援例欲徵苗所得職田苗曰年荒民困吾無以救尙忍征斂以肥己耶輒命己之同僚書無敢取召參議中書省事五年出爲陝西行臺侍御史遷陝西行臺御史中丞七年卒

贈據誠贊治功臣諡文獻

元 濟南般陽一路總管府

趙炳字彥明惠州灤陽人弱冠侍世祖於潛邸恪勤不怠初爲撫州長城邑規制爲之一新中統元年判北京宣撫司事三年李璫叛據濟南炳請討之國兵圍城炳將千人獨當北面有所俘獲卽縱遣去曰脅從之徒不足治也濟南平入爲刑部侍郎兼中書省斷事官改樞密院斷事官濟南妖民作亂賜金虎符加昭勇大將軍濟南路總管炳至止罪首惡餘黨解散歲凶發廩賑民而後以聞朝廷不之罪也遷遼東提刑按察司九年授京兆路總管兼府尹十四年加鎮國上將軍安西王相後爲運使郭宗所害贈中書左丞諡忠愍

濟南府志

卷三十四

官蹟二

夫

王構字肯堂東平人少穎悟風度凝厚學問該博文章典雅弱冠以詞賦中選爲東平行臺掌書記至元十一年授翰林國史院編修官十三年遷應奉翰林文字陞修撰歷吏部禮部郎中改太常少卿擢淮東提刑按察副使成宗立由侍講爲學士以疾歸東平久之起爲濟南路總管諸王從者怙勢行州縣民莫敢忤視構聞諸朝徙之北境學田爲牧地所侵者理而歸之官貸民粟歲饑而責償不已構請輸以明年武宗卽位召拜翰林學士承旨未幾以疾卒年六十三

趙孟頫字子昂宋太祖子秦王德芳之後也孝宗之兄伯圭賜第于湖州故孟頫爲湖州人幼聰敏讀書過目輒成論爲文操筆立就年十四爲真州司戶叅軍至元二十三年行臺御史程鉅

夫奉詔搜訪遺逸於江南得孟頫以之入見世祖顧之喜時方立尙書省命草詔頒天下帝覽之喜曰得朕心之所欲言者矣二十四年六月授兵部郎中二十七年遷集賢直學士每見必從容語及治道多所裨益自念久在上側必爲人所忌力請補外二十九年出同知濟南路總管府事時總管闕獨署府事官事清簡有元掀兒者役於鹽場不勝艱苦因逃去其父求得他人尸遂誣告同役者殺掀兒旣誣服孟頫疑其冤留弗決踰月掀兒自歸郡中稱爲神明僉廉訪司事韋哈刺哈孫素苛虐以不能承順其意以事中之會修世祖實錄召還京師乃解久之遷知汾州未上有旨書金字藏經旣成除集賢直學士江浙等處儒學提舉遷泰州尹至大三年召爲翰林侍讀學士仁宗卽

濟南府志

卷三十四

宦蹟二
元

完

位除集賢侍講學士延祐元年改翰林侍講學士大德三年拜翰林學士承旨帝眷之甚厚以字呼之而不名以比唐李白宋蘇子瞻至治元年英宗遣使卽其家書孝經是歲六月卒追封魏國公諡文敏子雍奕並以書畫知名

孟德濟南人元初由鄒平縣令任淄州節度使累官至同知濟南路事太宗八年諸王闊端命德爲元帥佩金符領濟南軍攻宋徐州光州降其眾而有其地歲甲辰定宗母六皇后稱制大王按只台以德爲萬戶積有戰功憲宗三年守睢州五年移守海州中統三年從征李璫璫平以老告歸子義襲爲萬戶領兵守

沂鄆

劉秉恕字長卿其先瑞州人世仕遼爲官族曾祖仕金爲邢州節

度副使因家焉自祖澤以下遂爲邢人庚辰歲木華黎取邢州立都元帥府以其父潤爲都統事定改署州錄事所至有惠愛生子秉忠仕至光祿大夫位太保卒贈太傅封趙國公諡文貞改諡文正秉恕其弟也好讀書弱冠受易於劉肅遂明理學秉忠事世祖以薦士自任嫌於私親獨不及秉恕左右以聞召見遂同侍潛邸世祖嘗賜秉忠白金千兩辭曰臣山野鄙人僥倖遭際服器悉出尙方金無所用世祖曰卿獨無親故遺之邪辭不允乃受而散之以二百金與秉恕秉恕曰兄勤勞有年宜蒙茲賞秉恕無功可冒恩乎終不受中統元年擢禮部侍郎遷吏部侍郎至元元年轉官法行改嘉議大夫爲淄萊總管淄萊府有死囚六人獄已具秉恕疑之詳讞得其實六人賴以不死歷

濟南府志

卷三十四

宦蹟一
元

三

彰德懷孟順天太原五路所至皆有惠政召除禮部尙書出爲淮西宣慰使年六十卒于官

李恒字德卿其先姓於彌氏唐末賜姓李世爲西夏國主太祖經畧河西有守兀納刺城者夏主之子也城陷不屈而死子惟忠方七歲求從父死主將異之執以獻宗王合撒兒王留養之及嗣王移相哥立惟忠從經畧中原有功淄川王分地以惟忠爲達魯花赤佩金符惟忠生恒恒生有異質王如撫之猶己子中統三年命恒爲尙書斷事官恒以讓其兄李瓊反漣海恒從其父棄家入告變瓊怒繫恒闔門獄中瓊誅得出世祖嘉其功授淄萊路奧魯總管併償其所失家資至元七年改宣武將軍益都淄萊新軍萬戶從伐宋十七年以平宋功拜資善大夫中書

左丞行省荆湖十九年命恒從皇子鎮南王征交趾中毒矢卒
後贈銀青榮祿大夫平章政事諡武愍再贈推忠靖遠功臣太
保儀同三司追封滕國公子散木斛江西行省平章政事次子
囊加珍益都淄萊萬戶孫薛徹子兵部侍郎次孫薛徹禿益都
般陽萬戶

元 山東東路都轉運鹽司

武秀仁宗時以清譽擢爲蒙陰令興學校勸農桑遷山東東路都
轉運鹽使去後民立石頌德

周信臣後至元元年十月中書察議任山東東路都轉運鹽使
清謹自勵精於簿書典章程式洞曉源委尤精於會計莅政之
後經畫綜理簡便節約百度秩然鹺政一新故度貯有定所舟

濟南府志

卷三十四

宦蹟二
元

三

車有定數出納有定期轉載有定直輸買先後有定序賞罰以
程勤怠罪償以警減耗於是度地府城北之上灤口買田清河
南墻界爲東西二區名之曰坵以受濱樂所入官權其策畫然
如一廷議以其課贏奏請加錫尙醞之尊金織幣帛迨於寮屬
者至再也政務克舉惠利及人至於祝釐之宮虞舜之祠皆修
理而新之閔子祠堂庶几席崇飭備具又購地於藥山爲義
冢六年夏徵爲戶部尙書學士張起巖爲作去思頌云

元 歷城

劉鼎字漢賓章邱人元初以功授忠顯校尉歷城令境內有大澤
號遙牆泊李豪據其地爲姦徵令不行一日往泊中伏壯士道
傍以一老斃夫自隨至其門門者識之趨入乃隨以入李方袒

既臥堂上見之愕然徐曰適以公事過此敬來相訪李喜起迎勞命酒食極歡而罷握手以出語且行屢顧之示將密語者李麾左右去復行至前伏起執之以歸杖殺之授廣威將軍益都總判兼安慰濟南淄德軍民勸農使行左右司郎中時庶務草創翁張施置悉以倚之益都李泉將分三路舉兵攻濟南致書李泉及其三帥罷兵修好如故壬辰正月卒贈資德大夫太常禮儀院使上護軍封彭城郡公諡獻穆

按歷城元時宦蹟舊志不載一人茲據章邱碑文錄之

元 章邱

張銀兒世祖初年任意邱達魯花赤治政有聲吏民畏服公廨皆其重建

濟南府志

卷三十四

宦蹟二
元

三

耿繼祖深州人至元五年任章邱縣尹莅政嚴肅

尙才英字世傑大名人大德五年由樞府掾任章邱縣尹盡心牧

愛一介不取舉廢必行去後民刻石頌之祀名宦

李惟肅真定人大德十一年以中書掾出爲章邱尹廉而恕剛而能斷弭姦去盜先教而後刑未幾闔內外翕然稱治至大三年春三月以皇太子命驛召入京師尹嘗指繡江語人曰吾惟飲此水耳因築亭於廨之後圃扁曰飲江爲燕息之所翰林學士承旨劉敏中爲記刻之石祀名宦

邢秉善字復初冀州信都人至順三年由翰林供奉任章邱縣尹爲政首事學校以身率先恭謁殿庭創立神門約已節食士論

美之

李彥表字儀伯汴梁人承父廕同知汝州事河南憲府舉堪補令
銓章邱縣尹至正五年初夏到任卽將無名典貼與皂爲蠹者
數百人斥去成服其剛正已多詞訟以無私照之愆一誠百訟
遂簡焉每月兩行稽考訟之繁簡驗社長勤怠待以優禮噴色
故社長悉心諭解又籍民之賢者兇者時加警束人益服其條
教適歲饑諭村置巡舖懸警鼓備壯丁相援羣盜不敢犯境公
務之暇講習經史凡有追呼里正齋牌依期而至獄之疑者明
清審讞無一冤結戶口逃亡爲吏竄名隱覈之復軍民百三十
餘戶賦役不均爲等其丁力高下民遂安業至於和買桑皮暨
馬晚秣菽事集而民不苦恒以敦厚風俗爲務親詣講堂與師
生講道庠序皆振常平倉積米三千石自陳撫字乖方發倉以

濟南府志

卷三十四

宦蹟二
元

三

賑丁亥夏旱徧禱羣祀而雨遂注芴及他境百姓歌其惠利城
北一水磴貧富交爭爲區畫之免八九千家貧民水害政聲籍
甚憲司諸公疊薦宣撫亦舉之在任三年擢江南行臺御史去
後四載民益思之中書省平章事張友諒爲撰德政碑以記之
元 鄒平

完顏從善字擇卿燕人至大四年由丞相東曹掾任鄒平縣尹剛
以勵氣廉以養分威而能和嚴而有恩精於綜覈纖微致察果
於裁割糾結必解其始至也文書填委連逮者日闐階下不決
旬而事皆決白圍扉夜啟坐獄於庭關譬百至往往悔其所訟
請退自新而敬禮賢逸崇尚儒學務革素習導民趨義一年小
治三年丕變庭無傲吏邑無冤人旣滿代去民思之不忍忘編

修明善爲作去思碑以頌之

陳彥武字埜仙歷城人後至元時爲鄒平縣尹典學興賢不尙苛猛勤心撫字役均事集境內大治至正十二年因城廢不修西鄙陸梁夜入焚劫乃重修縣城規制端敞教諭張崇文爲之記後以憂去民詣闕留之上允其請特授奉訓大夫祀名宦

孫福其先淄川人徙鄒平福少以材武稱金末兵起衆舉爲提控官保安鄉井盜不敢侵受撒里歹駙馬劄付懸帶銀符充軍民千戶元初以壬子收河南功授鄒平縣丞居官三十年人民畏愛子希武希亮希何俱有仕績大德四年其孫最爲之立石

楊禮淮陽人元統二年任鄒平主簿律己以廉莅政以勤徭役均平獄訟剖決自監縣長貳皆賢其爲人復竭力於教事葺理泮

濟南府志

卷三十四

宦蹟一
元

三

宮得沃衍之地歸諸學校以爲講習資焉

元 淄川

張孚元初爲淄川縣尹時海內甫定三十餘年州治之東北十里有山曰梓潼山之陽有漢大司農鄭公之廟古老相傳歷代祭祀不絕遭金季之亂爲火所燬尹至語諸同寮曰此廟廢已久矣若不一新之甚不副邦民瞻仰奉祀之意幸政有餘暇民有餘力盍經營之因白於淄州長官張夔欣然從之於是鳩材督工使匠者輸其能役者殫其力新廟奕奕煥然可觀民得以歲時致饗長山張泰亨爲記以美之

徐世雄至元三年爲淄萊路總管府判官修明倫堂親董其役堂

成賦詩刻石於明倫堂西北壁六年遣同兵部侍郎黑的使高

壁

阿觀赤大德六年任般陽路達魯花赤時教授久缺論堂無杌榻
塵盆覆地值省檄林過充學正言其狀特捐俸委淄川縣主簿
曹時以修論堂之任匠事靡愆不閱月而改觀於是總管趙守
謙等率府司官吏咸造堂中以語孟首羣籍而講之遐邇生徒
童冠咸來始如歸市耆老感歎又捐俸修理大成門學徒相與
歌之林過作記刻於石

孫宏毅字執甫後至元五年爲般陽路總管治郡有最聲翰林待
制趙仲禮亨賑登萊宿於淄有詩曰作郡期年治化成山東父
老頌孫卿夜來細數銅壺漏不是更聲是政聲刻石於縣堂西
壁

濟南府志

卷三十四

宦蹟二
元

壹

康庸字時中延安人至正六年任般陽路總管爲政知所先務每
以濟民爲念視篆之初淄郡廟學年久摧剝謁廟慨然思欲修
建以公務未暇越明年事稍輯首出已俸以倡僚屬佐之於是
新大成殿創建兩廡增高明倫堂計費二萬五千餘緡臺釐不
取諸民朔望行禮畢至明倫堂講明經史由是民知讀書之貴
皆遣子弟入學凡冤獄不明者皆能辨之山寇不犯其境他郡
饑民攜妻子來就食卽出米百石造粥食之活五百餘人張起
巖爲之記其事

張名德字德懋淄川人至正中任般陽路總管毛貴攻城名德嬰
城固守城陷被執不屈而死贈河南行省左丞諡忠襄

元長山

王樹德利津人至元中爲長山縣尹省刑罰均徭役減無名之費
罷不急之徵民立碑頌之祀名宦

安惟洪字仲達濟南路人至元二十九年由館陶令來尹長山端
方而明敏興學講經勸農均賦承審訟獄務得民情嘗修建學
宮志慮精勤物隨酬價役不及民又修三皇廟懷范樓及橋梁
具有成績三年秩滿民感戴立碑邑人張德翥撰記

孟仲賢許商人大德十一年由中書掾出爲長山縣尹化行民服
增修文廟廣置學田勤課試以作人才文風爲之丕振

劉仁智字之端北平人至大時由令史兩尹長山先教養而後刑
罰清靜簡易不爲煩苛理塵案化兇頑招流亡平賦役邑以大

治嘗修葺文廟置買祭器創立驛館增修三皇殿建明樓講堂

濟南府志

卷三十四

宦蹟二
元

美

百廢俱興規模宏遠民爲立碑邑人張德翥撰記祀名宦

楊僖字叔嚴濟陽人延祐中以名家子尹縣學仕兼優剛柔並濟

嘗有萬夫長恃貴漁民請於朝而杖之尋擢西臺監察御史泰
定閒官已四易而民猶追思立碑濟南張養浩爲文記之

孟居敬東昌人至治時爲長山縣尹興學校均賦役政平訟簡民

建碑懷之祀名宦

杜翺字雲翰上都人進士至正十年爲長山縣尹課農桑恤孤獨

崇禮讓絕苞苴戒鬻頑息獄訟一邑帖然蒞任初縣餉官馬徵

芻豆于民官爲給值監縣輒以僞楮易官緡訪獲之械左右不

少貸因學宮湫隘拓其地以建大殿及東西廚庫又於各鄉建

社學四十二區以勸民學至縣解三皇廟社稷壇日就圯毀皆

其鼎建役甫畢適奉檄徵民粟帛乃聽其自輸民皆樂就當道嘉其能舉爲一道最提舉企檄撰興學記學士張起巖爲著去思文祀名宦

苗居巖城武人至正十二年爲長山縣尹先是有張虎山者率妖眾萬人焚掠芴邑眾欲棄城避去尹至卽偕監縣忽都不花主簿符實董役築城趾厚二丈七尺高二丈五尺內外峭峻鑿塹四門各施棧板督民壯丁三百餘人晝夜守禦民心帖定城得保固邑人牛志學作記以美之

孫少府失其名元初爲長山縣尉果決尙氣遇事輒爲惟知濟眾不恤後艱病民徒涉孝水倡建石橋橋成復圯爲患更甚少府慨然曰河名孝婦吾爲直士本欲利民而功弗成是反病民也請以死謝遂自到邑人哀之爲之造墓立祠焉

濟南府志

卷三十四

宦蹟二
元

三

元 新城

楊温景州褚縣人至元二年任新城縣尹先是元初改齊之驛馬臺爲縣甫四十年下車之始巡歷鄉村相視民物謂同寮洎諸父老曰此邑桑土可以蠶而衣沃壤可以耕而食今縣治旣立而學廟未建風化何由而出乃請於元帥張公施廟地一區仍募官吏士庶各助已資委典史楊彬同諸佐經營之俾邑人瞻禮皆感發其善心論者謂改臺爲縣完聚居民得以克國用悉心興學教養人材有以昭文德於是二美具云

張勝字景賢真定路寧晉人世爲名家幼聰慧長勤問學博通經史習熟吏業至元三十年選充都護府令史至大元年六月受

敕牒承事郎新城縣尹三年二月抵任理斷公務正直均平凡有科撥量力增減剛毅不虧人心洽悅四月轅固等處蝨蝻生發領人夫晝夜防於荒塋不旬日掃除盡絕鄭黃溝堤衝決浚澇民田比及水發預修堅固久不爲害勸課農桑遍巡里社諭人戶趁時收採桑椹以備種植復逃亡戶得戶絕舉產四十餘畝永爲學田以贍師生皇慶元年十月以學舍卑陋創建講堂工匠飲食咸自俸出民忘其勞以趨事匠喜其功以告成公餘率縣中人吏朝夕講誦育材養士以待後用四境安和五事具備慶元元年歸德教授張德翥爲記其大畧云

合刺普華岳璘帖木爾子也幼侍母奧敦氏居益都嘗歎曰幼而不學有不墮吾宗者乎父時以斷事官建牙保定合刺普華往

濟南府志

卷三十四

宦蹟一

五

白其志父奇之俾習畏兀書及經史記誦精敏出於天性李瓊叛其母攜季子脫烈普華避地登萊聞音間隔絕號泣徹晝夜繼從叔父撤吉思平賊山東卒奉其母以歸撤吉思深加器重自謂其才不及言於世祖召給宿衛嘗以事至益都於四腳山下置廣興商山二冶以勞授金符爲商山鐵冶都提舉未及代以職讓其弟時兵南伐餽運繁興被選爲行都漕運使江南平出爲寧海路達管花赤遷江南宣慰使改廣東都運鹽使兼領諸番市舶時盜梗鹽法羣盜歐南喜僭王號右丞峻都督兵征交趾屬護餉道北至東莞博羅二界中遇賊歐鍾等眾寡不敵爲所執遂遇害於中心岡贈戶部尙書守忠全節功臣謚忠愍

高源字仲淵晉州人幼力學事母孝補縣吏中統初擢衛輝路知事至元十三年陞齊河縣尹廉靜寡欲莅事明暢精於政治民懷其德有遺愛去官十年民猶立碑頌之遷行臺都事僉江南浙西道提刑按察司事除河間等路都轉運副使二十八年僉都水監開通惠河置閘七橋十二人蒙其利授同知湖南道宣慰司事卒

文殊奴至元十五年任齊河縣丞廉靜寬平民心悅服捐俸修葺聖廟廊序尤有功於學校亦丞之不多見者也

常珪橫海人至元間任齊河主簿剛毅明敏銳於有爲修舉廢墜能聲上達一時名公巨卿多作詩文頌之

元 齊東

濟南府志

卷三十四

宦蹟二
元

三

探馬赤大德十年爲齊東監縣其祖曰不魯不花曾爲本位斷事官歲奉命撫安居民父不列阿土官敦武校尉充本縣達魯花赤兼管諸軍輿魯勸農事至探馬赤襲其世爵來莅是邑温恭愷悌好賢樂善慨然以興學爲己任創立學宮爲講授之堂招集子弟秀民以教諭之樂育人材時使薄斂士民舉仰慕之

高禧臨邑人元初任齊東縣尹政尙寬簡時境內有妖虎之患爲之默禱於神妖滅虎亦屏息歷任霑化安邱商河俱有政聲

鄭忽必烈後至元時任齊東縣尹重禮教修廢墜士民悅服

馬克敬至元時任齊東教諭教人有方修舉學政當時名宦深器

重之

元 濟陽

杜溥字浩卿冠氏人至元二十八年爲濟陽縣尹天資英爽莅事明敏而以忠敬將之振刷惟新威惠並著五事就緒亟以興建學校爲務意嚮所在者艾豪石爭先趨而相之未幾落成縣宇精彩爲之一變雅尙文學喜與士人遊其所守所行近於道而中於理更名而儒行興利除害與百姓休息實心實政至今尸祝之祀名宦

元 禹城

劉事義字伯宜濟南人由都省東曹知官差除掾遷大都酒使司提舉至元二十八年職滿出尹禹城縣爲曹州理所異時徭賦皆取決吏手上下推移貧富易位大爲民害尹覈實丁力畜產列爲等差或損或益咸稱平允時方春和力於勸課齎行糧就

濟南府志

卷三十四

宦蹟二

卑

食民家見田父野老勉其耕桑爲衣食本計人由是感悟皆以樹藝爲急積三歲計花果羣木二十四萬餘株野無曠土親屬爭訟者卽以恩義反復開諭率皆愧服自求解去建社學八十八區額外佐吏悉資遣入學爲生員率僚屬朔望會集敦勸後進風俗爲之一變邑去州治幾六百里凡督責期會之事靡不辦集而自始至終杜門卻饋一廉如水己亥秋境內產嘉禾一莖九穗表進於朝善政所感也尹工詩甲出時輩有聲海岱聞祀名宦

趙杞字仲獻南宮人由蔭補蒲陰尉以捕盜有方轉汝陽簿輔治公勤滿秩陞鹿邑令多德惠至正庚寅尹禹城是時河決金堤調夫役急而禹城遠隸於曹去河千餘里乃鞭騎星馳躬詣州

庭陳民所難辭哀氣和長允其請猶獨留尹董河事由春涉冬
方歸邑治民焚香以斗酒迓於路徐州海盜猖獗王師南征羽
檄劬午民惶懼不宐爲等第邑之上下預期運載官無責積民
不驚擾先時有無賴惡少猾黠搆奸乃求其桀魁抵以法餘黨
帖然故事每歲里正督民賦稅易富作貧害民尤甚尹察其事
密覈富實簿其丁額以次更用民樂其平有父子兄弟相告訐
者每以教化不明深自過己父子感悟而成孝慈修城池建學
宮葺先醫廟預爲營謀不累民而成功速性尙勤儉於公宇館
傳潔整修飭期代同於始至是皆嘉績善政德惠在而不忘者
祀名宦

元 臨邑

濟南府志

卷三十四

宦蹟二
元

聖

田壽字仲仁燕人至元十年以人才選臨邑縣尹爲人廉幹雄偉
莅事之日所部振肅綱紀法度截然一新凡發號施令皆出於
承流宣化履道奉公有犯必懲毫髮不貸數月之間豪猾縮頸
盜賊屏息庭無留訟曹無滯案公論所在直道而行雖總轄之
司巡按之使亦未嘗曲徇苟合事有不便於民者具利害情僞
申請再三必期改正而後已尤有心計處事周密凡營繕儲峙
和糴和買之類必爲之均節計料唱名而給直侵漁之弊無自
而啟先是防兵之在縣境者往往冒據膏腴之地以牧馬供軍
爲名民病之而莫敢校乃謀所以革之會朝廷遣官徧歷檢覈
於是遵奉詔條極力窮詰得田二十餘萬畝悉歸於民覆皆受
賜歡聲如雷監司大奇之劾近羣縣事有不法者多委就鞠焉

又出已俸增新文廟創建講堂一區給田六頃以爲贍學悠久之計增修縣廨位置高敞視他邑爲不侔矣異政告成瓜期在邇耆老豪望惜其將去爲之刻石頌德祀名宦

李載字從善廣川人真定路總管李惠之子大德四年以廕調任臨邑縣尹廉直自律門無私謁剖判文案申明賞罰摧強扶弱農田墾闢獄無淹囚期月之閒令行禁止招徠流民歸業者二百餘戶崇尚教化退食之頃躬率吏屬講貫詩書發明正道諸生濟濟容止可觀積習之弊一皆湔洗鄉社井間俱置黷舍誦讀不輟蔚然漸成禮義之俗秩滿受代行李蕭條士民感德拳拳不忘爲立遺愛碑祀名宦

元 長清

濟南府志

卷二十四

宦蹟二
元

聖

趙文昌字明叔父和卿原宿州人後遷長清因家焉文昌經明行修至元十年選爲本縣尹甫期月治聲籍著大興文教多有惠政嘗建三皇廟聚歷代醫書於中會邑人習之以祛民病後陞行臺侍御史遷福建閩海道廉訪使累資國子監祭酒謚獻簡邑人思慕其德立遺愛碑祀名宦

高伯溫字仲良燕人父裕興州知州以扈駕之上都因家焉伯溫潛心儒學初爲成均生員有制利用監辟爲幕下史進掾宣政歷三考調東平路知事進秩受白麻拜提點規運使時朝廷注意守令以其廉能有聲至元丙子歲拜長清尹抵任縮印視事氣爽神清劇別蠹簿書期會鞅掌紛如悉剖以義累年積弊一切振革修學校明人倫英髦濟濟若古君子之鄉嘗裏糧閒

出勸農課桑計植桑一十七萬七百株立義倉一百所積粟一千二百二十斛招撫流民五百一十九戶境內瀦水沒田百頃爲之立表相地開渠導水地悉爲膏腴時監司更法民將失業乃白大州達於朝廷克復舊章眾賴以安後秩滿邑人立碑以頌其德

杜世昌四川嘉州人至元十三年以人材任長清尹爲政公廉明敏長於聽斷鄰邑疑獄多藉其質成每歲仲春出郭督農事止匹馬從者一二人皆裹糧而行墟落歡聲四鄰洋溢時值軍馬南下充斥芻秣民逃竄乃出境迎迓撫以譯語所過秋毫無犯民賴以安至差役均戶口增田野闢盜賊息詞訟簡囹圄空在任三載士民數百人具牒請留累遷刑部尙書民思其德爲

濟南府志

卷三十四

宦蹟二

聖

立德政碑祀名宦

張著葛城人延祐初任長清石都寨巡檢德威是向不數月盜賊屏息豪猾畏服村居百里夜無犬吠巡警暇卽集山村耆民勉以孝弟忠信諭以法度律令遷善遠罪九年秩滿陞南京兵馬司指揮民爲立碑以頌其德政云

元 陵縣

陳祐字慶甫古趙人爲河南道總管遂家於洛邑性沈毅果斷不惑政事之名浮於文學每作古文字及詩探其源委皆從體國憂民處所發出故其動于中形于言者非欄轂王猷則簫勺人情者也至元七載冬十一月任山東東西道提刑按察使案部過德州乃書老農二詩於古平原之廨舍州牧黃彥文等爲刻

於石教授宋景祁跋其後云

按陵縣元時爲德州陳慶甫二詩石刻今在陵縣此其證也
武履常章邱人早歲筮仕爲淮西憲幕書史廉謹明恕能辨明疑
獄嘗出非辜死囚十二人翰苑名公以詩文褒美之由是聲名
藉甚遷承事郎知福建閩海道廉訪司事執政者才其爲選充
將作院經歷官換承務萬億綺源庫提舉俄改承直郎工部司
程尋拜奉議大夫中書檢校官復遷奉政順德鐵冶提舉未幾
特旨將作院經歷官考滿以最充德州知州進官朝散判治之
際力以興除爲務未踰再期而政聲四馳尋除知高唐州知州
年未七十力懇致仕朝議加秩三品眠古方伯加亞中大夫山
東宣慰副使

濟南府志

卷三十四

宦蹟二
元

四

按陵縣元代宦蹟舊志不載一人茲據章邱碑文錄之

元 德州

蒙哥官陵州達魯花赤中統三年濟南李壇反蒙哥力戰死之

秦政元初官陵州知州至元二十三年移建州治於舊治西立馬

營三十一年改建儒學於州治西南

杜明字顏卿延祐初官陵州知州政平訟理吏不敢欺先是秦政

改建學宮衛益之繼備之至延祐二年爲置祭器課生徒勤講

肄以身先之風化大行

林禎號善卿博野人泰定四年七月由民曹出知陵州興學勵農

均賦役恤癯獨獄無滯囚庭無留務善政善教州人刻石記之

賈棟直隸獲鹿人初爲山陰尹政成至正九年遷知陵州謁先聖

廟廷見禮殿傾頽卽以興修自任州石尙義者競輸物以佐之日往董役三月而竣增生徒勉富家子弟入學復其身以教勵之在平梁宜爲之記而刻于石

齊八元字舜卿延祐二年官陵州學正始擁臬比毅然恢樂育之志謝絕人事盡心訓迪弟子口取成材者多

她哩彌實官河閒路總管延祐四年悉收陵州羣兇之爲官民害者繫死獄中

崔敬官中書參知政事至正十七年山東毛貴田豐等作亂據東昌敬與平章達蘭參知暗達分省陵州陵州乃南北要衝無城郭居民散處敬兼領兵刑戶工四部事供給諸軍事無不集又以民力日疲請行納粟之令以給軍費民獲少甦

濟南府志

卷三十四

官蹟一

聖

也速蒙古人官左丞相僮有能名至正十八年守陵州東昌賊北寇遂出陵州也速縱之過境而邊擊於景州大破之斬獲殆盡拜中書平章政事

元 德平

盛諭德平人元初邑闕縣尹士人推以爲邑長告之州監令暫治縣事在年餘學宮毀於金季爲建草堂祀之

閻士安字仲和京邑人天資廉敏至元壬辰秋爲德平縣尹時儒學毀邑長盛諭嘗營建草堂士安至謁廟而歎曰明時尙文如此禮樂之所茲何宜缺遂偕主簿楊亨教官馮繼善與邑之賢

者史益讓等創建廟宇風俗丕變政務簡清不求聲譽秘書少

監楊桓作記以美之

楊亨字彥達京邑人至元二十九年任德平主簿性質直好善不
岐十二月莅任謂縣尹曰學廟風化之原今寸功未加何以爲
治尹曰待吾賢簿共之乃請於廉司白於州監贊以月給縣之
尹佐偕其屬各輸祿半載四民同稱所有以助焉爲大成殿及
門壯麗丹刻觀者咸曰不圖儒宮之盛使人敬仰如此亂後未
之見也勤修德政遠大豈易量哉

馮繼善元貞元年爲德平教諭修德廣業足爲社師故縣之尹佐
日率眾執經問難訪議得失爲學者先風俗翕然一變

元 平原

乾石烈名延年字九齡大德間尹平原恭惠寬和公貞峻潔而濟
之以敏幹修廟學增禮器方春勸課召鄉子弟告以孝弟力田

濟南府志

卷三十四

官蹟一

巽

有賞荒惰弗藝有罰革公胥之弊懲往來之擾定力役法著甲
乙籍四境熙然且經綸縝密公館道塗映澮郵遞無不修舉邑
人樹碑以紀異績

張仲鑑曹南人元統中平原尹操履清白政教兼舉不專於寬而
人安之不瀨於猛而人畏之吏民雍睦一邑稱治號賢令云

